

**Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata nr. 12, 19. november 2007-imeersup kingusinnerpaamik UPA 2013-imi allangortinneqarnissaanik, Naalakkersuisut peqquneqarnissaanik aaliangiiffigisassatut siunnersuut. Taamaaliornikkut inissiap attartukkap pisiarissallugu kissaatigineqartup akia niuernermi akigititaasut tunngaviginagit, taamaallaat teknikikkut aningaasatigullu inissiap akia naapertorlugu aalajangersarneqartalersillugu**  
(Inatsisartunut ilaasortat Malik Berthelsen, Kim Kielsen, Siumut)

**pillugu**

**Sanaartornermut Avatangiisinullu ataatsimiititaliap**

**ISUMALIUTISSIISUTAA.**

**Siunnersuutip aappassaaneerreqarneranut saqqummiunneqartoq.**

Ataatsimiititaliap suliaqarnerani ilaasortat uku kingullermik peqataapput:

Inatsisartunut ilaasortaq Juliane Henningsen, Inuit Ataqtigiit, Siulittaasoq  
Inatsisartunut ilasortaq Andreas Uldum, Demokraatit, Siulittaasup tullia  
Inatsisartunut ilaasortaq Storm Ludvigsen, Inuit Ataqtigiit  
Inatsisartunut ilaasortaq Knud Fleischer, Kattusseqatigiit Partiat  
Inatsisartunut ilaasortaq Malik Berthelsen, Siumut  
Inatsisartunut ilaasortaq Anders Olsen, Siumut  
Inatsisartunut ilaasortaq Kim Kielsen, Siumut

Ulloq 9. oktober 2012-mi UKA 2012-p ingerlanerani siullermeerneqareermat  
Ataatsimiititaliap siunnersuut misissorpaa.

**Siunnersuutip imaa aamma siunertaa**

Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaat nr. 12, 19. november 2007-imeersup allangortinneqarnissaata sulissutigineqarnissaa siunnersuuteqartut siunnersuutimikkut siunertaraat, taamaalilluni tuniniaanermi akiusoq teknikikkut aningaasatigullu naliliineq malillugu aalajangerneqartalerluni, niuernermi naligititaasumut taarsiullugu. Taamaalilluni inissiap attartortittakkap pisiarineqartup tuniniaanermi akia taamaallaat inissiap pitsaassusia aallaavigalugu akilerneqartassaaq, kiisalu alianaatsumiinnera, isikkivia il.il. eqqarsaatigineqaratik. Taamaalillunittaaq

siunnersuuteqartut paasinneriaasiat malillugu inissiat/illut ilaatigut piumaneqarnerat pissutigalugu pisortat pigisaat aalaakkaasut pissusissamisuunngitsumik akeqartinneqartarput. Teknikkikkut aningaasatigullu naligititap taamaallaat atorneqartarnerani, inuiaqatigiinni amerlanerusut Namminersorlutik Oqartussat kommunillu inissiaataannik attartortittakkanik ullumikkornit pisinissamut akissaqarnerulissasut naatsorsuutigineqarpoq.

### **Siunnersuutip Inatsisartuni siullermeerneqarnera**

**Siumup** siunnersuut taama isikkoqartillugu tapersorsinnaavaa, inissianik/illunik piumanerujussuaq pissutigalugu pisortat pigisaasa aalaakkaasut pissusissamisuunngitsumik akeqartinneqartarnerat partiip naleqqutinngitsutut isigimmagu, tamatumalu kingunerisaanik attartortut amerlasuut namminerisaminnik inigisamik pisinissamut akissaqartaratik.

**Inuit Ataqaigiit** Inatsisartut peqqussutaannik 2007-mi allannguinerup pisortat inissiaataasa ukiorpassuit matuma siorna sananeqartut attartortunut tuniniarneqassagunik inissiat pitsaassusiat qaangerujussuarlugit akilersinneqartalernerat kingunerigaa siunnersuuteqartut isumaqatigaat. Maanna inigisamik piginnittunut siunnersuutip piviusunngortinnera sunik kinguneqassanersoq paasiniaqqaartariaqartoq partiip kissaatigaa, tamannalu tunngavigalugu aappassaaneerinnginnermi siunnersuut Ataatsimiititaliami suliarineqassasoq inassutigineqarluni.

**Kattusseqatigiit Partiiata** oqaatigaa, attartortut amerlanerusut inigisamik piginnittuulersinnaanerannut pitsaanagerusumik periarfissiisoqassasoq partiip naalackersuinikkut anguniagarigaa. Aappassaaneerinnginnermi siunnersuut Ataatsimiititaliami suliarineqassasoq partiip kissaatigaa.

**Demokraatit** isumaqarput, inigisanik niuorneq pittuttorsimannngitsumik aamma unammilleqatigiinnermi piumasarisat tunngavigalugit ingerlanneqartassasoq. Tamanna tunngavigalugu Demokraatit siunnersuut tapersorsinnaanngilaat.

**Naalackersuisut** siunnersuut itigartinneqassasoq inassutigaat, Naalackersuisut aarleqqutigigamikku, tunisinerit teknikkikkut aningaasaqarnikkullu nalinganik taamaallaat tunngaveqartut, ininik nioqquteqarneq pitsaanngitsup tungaanut sunniuteqarfigisinnaagaat, kiisalu pisortat ininik akikinnerusujussuarmik tuniniaappata, innuttaasut inigisaminnik niuernermit akiusoq malillugu pisisimasut inigisamik tuninissaat ajornakusoortitorujussuannngussagaat. Taamaattumik Naalackersuisut malittarisassat atuuttut attatiinnarnissaat kissaatigaat, niuernermit pissutsit kiffaanngissuseqartumik akinut aalajangiisussaasut tunngavigalugit.

### 3. Siunnersuut pillugu Ataatsimiititaliamit siuliaqarneq

Aallaqqaasiullugu Ataatsimiititaliap oqaatigissavaa, illoqarfinni anginerni attartortut initik attartukkatik akikinnerusumik pisiarinissaannut periarfissaqartinnissaanik qulakkeerussinnissaq siunnersuummi siunertaanngitsoq siunnersuuteqartut aalajangiiffigisassatut siunnersuutiminni oqaatigimmassuk. Tamatumunnga atatillugu siunnersuuteqartut Inatsisartut peqqussutaanni nr. 6-imi, 15. april 2003-meersumi § 8, imm. 5-imut innersuussipput. Aalajangersagaq ima oqaasertaqarpoq: *“Naalakkersuisut aalajangersinnaavaat inissiaq akimik imm. 2-mi taaneqartumit allaasumik appasinnerusumillu akilerlugu tunineqarsinnaasooq niuernermi pissutsit tamanna pissutissaqartippassuk”*. Aalajangersagaq taamanikkut Namminersornerullutik Oqartussat kommunillu inissiaataasa attartortittakkat pigisatut inissiannngortissinnaaneratt pillugu Inatsisartut peqqussutaanni nr. 5-imi 21. maj 2002-meersumut allannguutaavoq. Inatsisartut peqqussutaat taanna Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaanni nr. 12, 19. november 2007-imeersumi § 17, imm. 2 naapertorlugu atorunnaarsinneqarpoq. Aalajangiiffigisassatut siunnersuut una akuerineqassagaluarpat, tamanna ima isumaqassaaq, inissiamut attartortittakkamut tuniniaanermi akiusooq teknikkikkut aningaasaqarnikkullu naliliineq tunngavigalugu tamatigut aalajangerneqartalissamat.

#### 3.1 Teknikkikkut aningaasaqarnikkullu naliusup aamma niuruteqarnermi naliusup nassuiarneqarnerat

Namminersornerullutik Oqartussat kommunillu inissiaataasa attartortittakkat pigisatut inissiannngortinneqarsinnaaneratt pillugu Inatsisartut peqqussutaat pillugu nassuiaat – *“Attartortumiit piginnittumut aaqqissuussineq”*-mi teknikkikkut aningaasaqarnikkullu naliliineq aamma niuernermi naligititaq ima nassuiarneqarput:

*Teknikkikkut aningaasaqarnikkullu naliliineq. Inissiap pisiareqqinnerani akiusup annertoqatigaa. Naliliinermi aningaasartaliunneqartoq tassaasannngilaq tunisinermi pisinermiluunniit akigititassaq, taamaallaalli illup pisoqaassusaa qanorlu issusia tunngavigalugu nalinganik aalajangersaataalluni. Illup teknikkikkut aningaasaqarnikkullu nalinga aalajangersarneqassaaq:*

*pisiareqqinnerani akiusumut, aserfallatsaaliorneqannginnera nalikilliliinerillu ilanngaatilgalugit. Inissisimaffia, alianaatsumiinnera imaluunniit niuernikkut pissutsit inissaaleqinerlu teknikkikkut aningaasaqarnikkullu naliliinermut sunniuteqassanngillat. Illu ukiut 50-it inorlugit pisoqaassusilik tamakkiisumik ukiuni 75-ini atasinnaasutut naatsorsuutigineqartarpoq. Illu ukiut 50-it sinnerlugit pisoqaassuseqarsimappat, atasinnaassusiani tamakkiisumik piffissaq sinnerluttoq tunngavigalugu immikkut naliliinikkut aalajangersaasoqassaaq, tasanilu nalinginnaasumik aserfallatsaalineqarnera immaqalu tamakkiisumik iluarsaanneqarsimanera eqqarsaatigineqassapput.*

**Niuernermi nalinga.** Tassaavoq aki, inissiap ullumikkut isikkua tunngavigalugu tamanut ammasumik niuerutigineqarsinnaasoq, tamatumani inissiap najugaqarfigineqannginnera apeqqutaassalluni. Niuernermi akiusoq teknikkikkut aningaasaqarnikkullu naliliinermit appasinnerusinnaavoq, teknikkikkut aningaasaqarnikkullu naliliineq nnertoqatigisinnaallugu imaluunniit teknikkikkut aningaasaqarnikkullu naliliinermit qaffasinnerusinnaalluni.

*Assersuutigalugu*

- Nanortalimmi inissiap niuernermi nalinga teknikkikkut aningaasaqarnikkullu naliliiffigineqarneranit appasinneruvoq
- Qaqortumi inissiap niuernermi nalinga teknikkikkut aningaasaqarnikkullu naliliinerup annertoqatigaa, aamma
- Nuummi inissiap niuernermi nalinga teknikkikkut aningaasaqarnikkullu naliliiffigineqarneranit qaffasinneruvoq.

**Alianaassusaata nalinga** niuernermi nalingata ilagaa, assersuutigalugu inissiap inissisimaffia imaluunniit inissiamiit isikkivik tunngavigalugit inissiamik akisunerulersitsisoq. Alianaassuseq aalajangersimasuunngilaq, aammalu inuit ataasiakkaat namminniivillutik naliliineralugu. Ilaasa sumiiffimmi aalajangersimasumi najugaqarnissartik pingaartittorujussuusarpaat, tassalu ineqarfimmut, assersuutigalugu inuit aalajangersimasut najugaqarfigisaanni. Allat inissiamiit isikkivik, aammalu pinngortitamut qanilluni inissisimanissaq pingaartittorujussuusarpaat. Alianaassuseqanngitsumiinneq aamma soorunami akiusumut sunniuteqartarpoq. Kiisalu alianaassutsip annaaneqarnera aamma akiusumut sunniuteqartarpoq. Assersuutigalugu sanaartugaq annertoq, soorlu angallannerup nipiliornerullu annertusineranik kinguneqartoq, imaluunniit inissiamik isikkivimmik assiisoq niuernermi nalinganik appartitsisinnaavoq.

Taamaalilluni nassuiaatit malillugit teknikkikkut aningaasaqarnikkullu naliliineq tamatigut akikinnerpaatut naliliinerunngitsoq pingaaruteqarpoq paasissallugu.

Aamma ilanngunneqassaaq, malittarisassat atuuttut malillugit Namminersorlutik Oqartussat aamma kommunit Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaat nr. 12, 19. november 2007-imeersoq naapertorlugu ilisimasalimmik pituttorsimanngitsumik sulisitsisarmata.

### **3.2 Tusarniaaneq**

Ataatsimiititaliami suliaqarnermut atatillugu aalajangiiffigisassatut siunnersuut pillugu allakkatigut tusarniaanissaq Ataatsimiititaliap aalajangersimavaa. Pisortanit namminerisamillu inigisanik niueruteqartarnermi akitigut ineriartorneq pillugu tusarniarneqartut oqaaseqaatiminnik saqqummiussinissaannut Ataatsimiititaliap aamma qinnuigisimavai. Tusarniarneqartut oqaaseqaatiminnik saqqummiussinissaminnut tusarniaanermi piffissaliineq

sap. ak.-nik marlunnik sivisussusilik naammattutut Ataatsimiititaliap nalilersimavaa. Taamaattorli piffissarititap qaangernerani tusarniaanermi akissutit tiguneqartut Ataatsimiititaliap suliarinninneranut ilanngunneqarput. Tusarniaanermi allagaq aamma tusarniaanermi akissutit isumaliutissiisummut uunga **ilanngussaq 1**-tut tapiliunneqarput. Aalajangiiffigisassatut siunnersuut pillugu uku tusarniarneqarsimapput: KANUKOKA, kommunit, Sulinermik Inuussutissarsiuteqartut Kattuffiat/SIK, Sulisitsit/Grønlands arbejdsgiverforening, Grønlandsbanken, BANKNORDIK, NUNA-advokater, Advokatfirmaet Malling & Hansen Damm, Grønlands Revisionskontor, Deloitte, Ineqarneq pillugu maalaarnissamat ataatsimiisitaliaq/Boligklagenævnet, Nykredit, INI A/S, Iserit A/S, Nykredit, DLR kredit, Totalkredit, Grønlands Ejendomskontor, Ejendomskontoret Igldlo.

Ataatsimiititaliaq ukunanit tusarniaanermi akissutinik tigusaqarsimavoq: Grønlandsbanken, Sulisitsit/Grønlands arbejdsgiverforening, INI A/S, Iserit A/S, Nykredit, DRL Kredit, Qeqqata Kommunua aamma Grønlands Ejendomskontor.

Pingaarnertut ajornartorsiutit tusarniarneqartunit saqqummiunneqartut uani Ataatsimiititaliap erseqqissaatigissavai:

**Grønlandsbanken:**

Grønlandsbanken tusarniaanermi akissummini siunnersuutip kingunerisassai arlalissuit isummorsorfigisimavai. Pineqartut tassaapput illunik maanna piginnittunut kingunissai, aningaasalersuisartunut kingunissai, siunnersuutip inuuniarnikkut inuiaqatigiinnullu tunngasortai aamma illunik nutaanik sanaartornermut tunngasunut pissutsit.

Grønlandsbanken ilaatigut ima taasaqarpoq:

“Maanna illunik piginnittunut kingunissai

*Illuutillit maanna inatsisit atuuttut atorlugit pingaartumik illoqarfinni anginerni pisiaqarsimasut illutimik niueruteqarnermi nalinga appassasoq misigisinnaassavaat. Tamanna qularnanngitsumik illunik pisisut arlallit pigisap nalinga sinnerlugu akiitsoqalernerannik kinguneqassaaq. Pigisat nalingat sinnerlugu akiitsoqalernerneq illuutilinnut piviusumik pituttuinermik kiisalu aningaasatigut annaasaqarnissamat aarlerinartorsiornermik kinguneqassaaq. Kiisalu illunik/inissianik pisinermi sinaakkutissatut piumasaqaatinik allannguinerit siunnersuummi taaneqartutut amerlanerit namminerisaminnik inissianik pisisinnaalersiinnarnagit, akerlinganik namminerisamik illumik pisinissamat aatsaat nalornilersitsissapput. Tassanngaannartumik naalakkersuinikkut allannguutissatut siunnersuutip illup/inissiap nalinganik ima annertutigisumik naleerussisitsisinnaneranani, tamanna nalorninermik pilersitsisinnaavoq, allaat namminerisamik pisisut attartortumit piginittuulernerit imaluunniit namminerisamik ininik/illunik aamma pisinissat pisinngitsoortissinnaallugit. Oqaatigineqassaaq siunnersuutip*

*namminerisamik illuutit tamarmik nalingat sunnersinnaammagu, taamaallaallu attartortumit piginnittuunermut aaqqissuussinermit inigisat/illuutit pinnagit.”*

...

“Aningaasalersuiffinnut kingunissai

*GrønlandsBANKEN-imut pingaaruteqarpoq tikkuassallugu, Kalaallit Nunaanni inissianik/illunik aningaasalersuinermit sinaakktissanik tassanngaannartumik allannguinerit aningaasalersuiffinnut (taarsigassarsisitsisarfinnut aamma aningaaserivinnut) Kalaallit Nunaanni namminerisamik illunik niueruteqarnermi annertunerpaamik aningaasalersuisartunut nalorninermik pilersitsissammata. Aningaasalersuiffiit Kalaallit Nunaanni uninnialernerannik imaluunniit aningaasalersuinerup annikillisinneqarneranik imaluunniit Kalaallit Nunaanni aningaasalersuinerup atatillugu killilersuinerulernerannik kinguneqarsinnaavoq. Kalaallit Nunaanni ingammillu illoqarfinni anginerusuni illunik/inissianik niuerneq tamatuma unitsissavaa.”*

.....

“Siunnersuutip inuuniarnikkut inuiaqatigiinnullu tunngasortai

*Siunnersuutip inuuniarnikkut inuiaqatigiinnullu tunngasortai pitsaanngitsut immaqa allannguutissatut siunnersuummut ajornartorsiutaanerpaapput. Attartortumit piginnittuunermut maanna aaqqissuussinerup allanngortinneqarnera inuiaqatigiinni sannginnerpaanut iluaqutaanaviangilaq. Akerlinganilli illuminnik/inissiaminnik nammineq aningaasalersuisinnaasut niueruteqarnermi piumasarisanut nalinginnaasumik akinik aalajangiinikkut akiliinissaminut naleqqiullugu illumik/inissiamik akikinnerusumik periarfississinnaallugit. Tamanna maannamut ajunngitsumik misissorneqarnikooqaaq. Aningaaseriviup assersuutigalugu “Naalakkersuisut 2012-imi ineqarneq pillugu naalakkersuinikkut ingerlatsinermit nassuiaataat” innersuussutigisinnaavaa. Tassani takuneqarsinnaavoq, ineqarnermi tapiissutinik aaqqissuussinerit peerneqarpata, akunnattumik isertitaqartartunut isertitaqqortuunullu akissaajaatit tunngaviusumik annertusissasut, taamaattorli isertitakitsunut ineqarnermut akissaajaatit allanngunngijajavissallutik. Tamanna isertitakinnersusut (isumaginninnikkut pisartagallit il.il.) niueruteqarnermi piumasarisat imaluunniit teknikikkut-aningaasaqarnikkut naliliineq tunngavigalugit inigisamik/illumik aningaasalersuisinnaannginnerannik pissuteqarpoq.”*

.....

“Illunik nutaanik sanaartornermut tunngasunut pissutsit

*Allannguutissatut siunnersuummut tunngasuteqartoq tassaavoq, namminerisamik sanaartortitsisut illunik/inissianik nutaanik sanaartornermut aningaasalersuutissanik nassaarnissamut ajornartorsiorsinnaanerat. Illut/inissiat nutaat niueruteqarnermi nalingat nalornissutigaanni, tamanna illunik/inissianik sanaartornissamut aningaasalersuutissanillu periarfissaqartitsinermit kajumissuseerutitsisinnaavoq. Siunissami sanaartornerit tamarmik taamaallaat Namminersorlutik Oqartussanit kommuninillu ingerlanneqartalernissaannik tamanna kinguneqassaaq.”*

Grønlandsbankenip tusarniaanermi akissutaa tunngavigalugu Ataatsimiititaliap malugisinnaavaa, illunik piginnittunut, illunik pisisunut, illunik niuernermit aamma illulortiternermut minnerunngitsumillu aningaasalersuiffinnut siunnersuut ajortunik arlalissuarnik kinguneqassasoq. Ataatsimiititaliap immikkut maluginiarpa, siunnersuut illuutilinnut annertoqisumik ajortunik kinguneqarsinnaasoq, pigisat nalinga sinnerlugu illuutillit amerlasuut akiitsoqalersinnaanerit aarleqqutigineqarsinnaammat, tamannalu illuutillit illuminnut pituttornissaannik kinguneqassaaq. Kiisalu Grønlandsbankenip tikkuarpa, aningaasalersuisartut qularnanngitsumik Kalaallit Nunaanni aningaasalersuinertik unitsissagaat annikillisilluguluunniit, imaluunniit Kalaallit Nunaanni aningaasalersuineq sukannerningortissinnaallugu. Tamanna sanaartornerup annikillerujussuarneranik kinguneqarsinnaavoq, suliffissaaleqineq sualummik sanaartornermi annertusiartuaarluni, tamatumalu kingunerisaanik ilinniarfissat annaaneqarlutik. Taamatut oqariartuuteqarneq ernumanartorujussuuartut ilungersunartutullu Ataatsimiititaliamit isigineqarpoq.

#### **DRL kredit:**

DRL kredit-ip Grønlandsbankenip oqaaseqaatai isumaqatigai. Taamaattumik Ataatsimiititaliap qulaani oqaaseqaatit taaneqartut innersuussutigissavai.

#### **Nykredit:**

Grønlandsbankenip tusarniaanermi akissutaa ilisimallugu Nykredit-ip taavaa, kisiannili ataasiakkaanik ilassutissaqarlutik. Nykredit-ip ilaatigut makku taavai:

*“Pineqartumi pigisat aalaakkaasut kiap piginerai apeqqutaatillugit pigisap niueruteqarnermi nalingata nalilerneranani nalileeriaatsinik assigiinngitsunik marlunnik tunngaveqarnissaq annertuumik nalornissuteqarnermik kinguneqassaaq. Tamatuma tungaatigut sunilluunniit nalornissuteqarnerit nalunannigilluinnartumik aningaasalersuinermut ajortumik sunniuteqassapput.*

*Pigisap attartortumit piginnittuunnermit aqqissuussineq malillugu aatsaat ukiut arlallit qanngiunneranni tuniniarneqarsinnaaneranut piunasaqaat – siunnersuut qanoq timitalernerneqarnerisoq apeqqutaatillugu – qularnanngitsumik realkredit-imit taarsigassarsinertut akuerineqarsinnaanaviannigilaq, piunasaqaammi pigisap tuniniarneqarsinnaaneranut killiliissammat.*

*Kalaallit Nunaanni pigisanik nalilinnik niueruteqarnermi pingaarutilimmik akuusutut, siunnersuutip piviusunngornerani – malitsigisaanillu niueruteqarnermi naligitap kiisalu tuniniaasinnaanerup killilerneqarneranik nalornissuteqarnermi – Kalaallit Nunaanni aningaasalersueqataasarnitsinnut piunasaqaatit nalileqinnissaannut Nykredit pissutissaqalersinnaavoq.”*

Pineqartumi pigisat aalaakkaasut kiap piginerai apeqqutaatillugit pigisap niueruteqarnermi nalingata nalilerniarnerani nalileeriaatsinik assigiinngitsunik marlunnik tunngaveqarnissaq annertuumik nalornissuteqarnermik kinguneqassasoq pillugu Nykredit-ip oqariartuutaa Ataatsimiititaliap immikkut maluginiarpaa. Tamatumani tigussaasumik Nykredit isumaqarpoq, pigisat aalaakkaasut ilai pisortanit pigineqartut sumiiffimmi teknikkikkut aningaasarnikkullu nalileeriaaseq malillugu nalilerneqarumaartassasut, allalli pisortanit pigineqanngitsut niueruteqarnermi akusooq atorlugu tunineqartassasut. Ataatsimiititaliattaq maluginiarpaa, siunnersuut akuerineqassappat, Nykredit-ip Kalaallit Nunaanni aningaasalersuisarnermik peqataasarnini nalilersoqqinniaraa, sunniutissarlu Ataatsimiititaliamut ilungersunartuuvoq, tamannami suliffissaaleqinerup annertusiartorneranik aamma sanaartornermi ilinniarfissanik annaasaqarnermik kinguneqarsinnaammat. Ataatsimiititaliattaq Nykredit-ip oqariartuutaani maluginiarpaa, pigisap aalaakkaasup attartortuunermi piginnittuunermut aqqissuussineq malillugu pisiarinqarsimasooq, aatsaat ukiut arlallit qaangiunneranni tuniarneqarsinnaanera piumasaqaataammat, tamanna realkreditimik taarsigassarsiniartarfinit ataqqineqarsinnaanngimmat. Taamatut oqariartuuteqarneq Ataatsimiititaliap ima paasivaa, realkreditimik taarsigassarsitsinerit ukiut arlallit aatsaat qaangiunneranni tuniarneqarsinnaanerannik piumasaqaatatillit Nykredit-ip akuersaarsinnaanngikkai.

#### **Kalaallit Nunaanni Sulisitsisut Peqatigiiffiat (GA)**

GA-p siunnersuut tapersorsinnaanngilaa, siunnersuummi immikkut makku maluginiaramikkut:

*“Taamaalilluni siunnersuut nunami attartortunut naapertuilluanngilaa, assersuutigalugu Nuummi attartortut akiitsutit pinnagit nalinga pisassagamikku, taamaattorli illoqarfinni amerlanerni allani attartortut initik attartortakkat illoqarfimminni niuernermi akiviusooq qaangingaarlugu pisiarisariaqartassallugit. Taamaalillutik attartortut tamakku kingornatigut initik nammineq pigisatik tunissagunikkut annaasaqartariaqassapput.”*

...

*“Kalaallit Nunaannut pingaaruteqarpoq, kiffaannngissuseqarluni akinik pilersitsisarnerup aalajangiusermanissaa, niuffaffillu pisortanit piviusorsiuunngitsumik akuliunnikkut sunnerneqassanngitsoq. Kiffaannngissuseqarluni akinik pilersitsisarneq innarlerneqarpat, illunik/inissianik pisisunut tunisisunullumi toqqissisimannnginerujussuarmik kinguneqassaaq, niuernermilu naliusut ilaatigut Nuummi maanna illunik/inissianik piginnittuusunut taarsigassarsitsisunullu annertoqisumik annaasaqarnissaq aarleqqutaassaaq. Aningaaseriviit taarsigassarsitsisarfiillu tamanna tunngavigalugu maanna inissianut peqqinnartumik taarsigassarsitsisarneq neqeroorutigisinnaajunnaassavaat, tamatumani lu niuernermi naligitat suli naqinneqaraluttuinnassapput.”*



Ataatsimiititaliap maluginiarpaa, inigisat tunineqartussat taamaallaat inigisap nalingata teknikkikkut aningaasaqarnikkullu nalinga tunngavigalugu nalilerneqartassappata, inissianik attartortunut sunniutissaat GA-p immikkut isummersorfigigai. GA-p uparuarpaa, attartortut sumi najugaqarnerat apeqqutaalluni immikkut pineqassasut, immikkoortitsinerlu tamanna naapertuussorinangitsoq. Assersuutigalugu Nuummi attartortut akitsuutit pinnagit nalinga tunissutisariissavaat, pisinermilu akiusumut naleqqiullugu iluanaarutaalluurtumik init tunineqarsinnaassallutik, illoqarfinnili allani attartortut initik attartukkatik niuerutigalugu nalinganit qaffasinnerungaartumik pisiarisariaqassallugit, tamannalu taakkununga pilerinartuunaviangilaq. Ilutigalugu GA-p naqissuserpaa, piviusorsiuungitsumik pisortanit akuliuffigineqarani kiffaangissuseqarluni akinik pilersitsisarnerup aalajangiusimanissaa Kalaallit Nunaannut pingaaruteqartuusoq. Ilaatigut Grønlandsbankenissulli GA-p tikkuarpaa, siunnersuut piviusunngortinneqassappat, tamanna ininik niuernerminni nalorninerujussuarmik kinguneqarsinnaasoq, tamannalu aningaaseriviit realkreditimillu taarsigassarsiniartarfiit taarsigassarsisitsinerminni piumasaaqatiminnik nalilersueqqinnissaannik kinguneqassasoq. Kiisalu GA-p tikkuarpaa, siunnersuut illut nutaat sananeqartut niuernerminni akiinik nalorninermik kinguneqassamat, taamaalillunilu illunik nutaanik sanaartorneq aningaasaliissutissanillu periarfissaqartitsinissaq pilerinartuujunnaassasoq. Naggataatigut Namminersorlutik Oqartussat aamma kommunit illunik/inissianik kisimik sanajumasinnaanerannik tamanna kinguneqassaaq. Pisortat sanaartornermut aningaasaliissutaat ukiumit ukiumut suli annikilliartuinnarmata, ersarippoq tamanna nuna tamakkerlugu annertunerusumik inissaaleqartuinnarnermik, suliffissaalleqartuinnarnermik il.il. kinguneqassasoq.

### **Iserit A/S**

Iserit A/S-ip tusarniaanermi akissutimini piffissami tuniniaanermut akiusup teknikkikkut aningaasatigullu naliliineq malillugu aalajangerneqartarnerata nalaani misilittakkani aallaavigaa. Iserit A/S ilaatigut ima taasagarpoq:

*“Aaqqissuussinerup nutaanngitsup pitsaaqutaa qularutissaanngitsumik tassaavoq, illut pisortanit pigineqartut amerlasuut piginnittunut inuinnarnut tuniniarneqarnerat iluatsimmat, taamaalillutik pisortat piffissaq ungasinnerusoq tunaartaralugu aserfallatsaaliinermik pisussaaffeqarunnaartarlutik.*

*Ajoqutitut taaneqarsinnaapput illoqarfinni angisuuni aningaasaliissutitigut isertitat annertuut iluaalliortitsisut, sinngatitsisut mamiassutisut. Tamatuma saniatigut oqaatigineqarsinnaavoq, aaqqissuussineq pisortat inissiaataasa attartortittakkat ikilinerinik kinguneqarmat, tamatumanilu inissiat attartortittakkat pilerinartut amerlassusaat inoqutigiinnut isertitakitsunut periarfissaasut ikilillutik.*

*Naak aaqqissuussineq nutaaq ukiuni arlalinni ingerlasimagaluartoq, attartortumit piginnittumut aaqqissuussineq annertuutitigut unittoorsimasoq maluginiartariaqarpoq.*

*Pisortanit inissiaatit/illuutit amerlanerit inuinnarnut tunineqarnissaat naalakkersuinikkut suli kissaatigineqarpat, aningaasarsiornikkut tamanna pilerinartuutinneqartariaqarpoq. Pilerinartuutitsineq tamanna ullumikkut atuutinngilaq, imaluunniit ima annertutigini ani aaqqissuussineq illoqarfinni anginerusuni pilerisaarutigineqartarani.”*

....

*“Iserit A/S illoqarfinni mikinerni ajornartorsiuteqanngilaq, taakkunani illut niuruteqarnermi akigititamut pisiarinissaat attartortunut aningaasaqarnikkut annertuumik iluaqutissartaqareemat, tamannami naliliinermik akigititaaratarsinnaasumut naleqqiullugu tamatigut annertoqisumik pitsaaqutissartaqartarmat.*

*Taamaattorli namminerisamik inissiap/illup pisiarinissaanut – ilaatigut – inissiani pisortanit attartortikkani, ingerlatsinermut akissaaqaatit ineqarnermut qularnaveeqqutitut akiliutigisartakkanut pitsanngoriaatsit ilanngullugit annertunerusumik tulluarsarnerisigut, ineqarnermut akiliutip annertuumik naleqqussarneratigut pisinnaannginnersoq isumaliutigineqartariaqarpoq.*

*Ilanngullugu isumaliutigineqartariaqarpoq, inissianik/illunik tuniniaanermi isertitat illoqarfinni, illunut pisortanit attartortittakkanik annertuumik utaqqiffiusartuni, sualummi Nuummi, inissiat attartortittakkat nutaat sanaartorneqarnerannut tutsinneqartassasut. Taamaanngippat inissianik/illunik attartortortumit piginnittumut aaqqissuussineq tunngavigalugu tuniniaasarneq utaqqisuniittut suli amerlanerulernerannik kinguneqarsinnaavoq, tamatumani sulisut illoqarfinnut suliffissaqarfusinnaasunut nuttarsinnaanerat annikillisinneqassaaq.”*

Ataatsimiititaliap maluginiarpaa, siusinnerusukku aaqqissuussinermi pitsaaqutaasoq taassaasimasoq, pisortanit inissiat amerlasuut namminerisamik piginnittunut tunineqarnerat iluatsissimammat. Peqatigalugu Iserit A/S-ip tikkuarpaa, pisortat taamaalillutik aserfallatsaaliinissamik pisussaanertik annikillissimagaat. Taamaattorli Iserit A/S-ip erseqqissaatigaa aaqqissuussinermi ajoqutaasoq tassaasimavoq, illoqarfinni angisuuni aningaasaliissutitigut isertitat annertuut, kiisalu pisortanit inissiat attartortittakkat ikinnerulersimanagerat inoqutigiinnut annikikannersumik isertitalinnut inissiat attartortittakkat pilerinartut ikinnerulersimanagerannik kinguneqartoq. Kiisalu attartortumit piginnittumut aaqqissuussinermi niuernerup ingerlaqqilernissaanut aningaatigut pilerinartuutitsinissaq pisariaqassasoq Iserit A/S-imit oqaatigineqartoq, Ataatsimiititaliap maluginiarpaa. Pilerinartuutitsinermut inissianut attartortittakkanut ineqarnermut akiliutip naleqqussarnissaa siunnersuutigineqarpoq. Peqatigitillugu Iserit A/S-ip siunnersuutigaa, tuniniaanermi isertitat inissianik attartortittakkanik nutaanik sanaartornermut atugassanngortinneqarsinnaanerat isumaliutigineqarsinnaanersoq, taamaalilluni attartortumit piginnittuunermut aaqqissuussinermi tuniniaaneri utaqqisut suli amerleriaqqinnerannik kinguneqassanngimmata. Tamatumunnga aamma Ataatsimiititaliap oqaatigissavaa, pigisat

aalaakkaasut attartortumit piginnittuunermut aaqqissuussineq malillugu tuniniarneqartut amerlassusaat ataavartumik ikiliartornissaat naatsorsuutigineqarsinnaasoq. Pigisarmi aalaakkaasoq pisortanit pigineqartoq pisortanit ataasiaannarluni tuniniarneqarsinnaavoq, pigisallu aalaakkaasut pilerinarnarpaat qangali tunineqareerput, taamaattumillu inissiat pilerinannginnerit pisortanit sulii pigineqassallutik. Tamatumalu saniatigut inuit amerlanerpat ima inuuneqarput, piginnittuunermiit attartortuuneq pilerinarnarpaattarlugu.

### **Inissiaatileqatigiiffik INI A/S**

INI A/S aalajangiiffigisassatut siunnersuummut ima oqaaseqaateqarput:

*“Inatsisartunut ilaasortat tunngavilersuutaata Inissiaatigileqatigiiffiup INI A/S-ip ima atuarpaa, siunnersuutip imminermi tunngavigigaa, Inatsisartut peqqussutaat nr. 6, 2003-mi 15. aprilimeersup Inatsisartut peqqussutaat nr. 5, 2002-mi 15. majimeersoq taarseraa, taannalu malillugu illunik allanut akikinnerusumillu tunisoqarsinnaasoq. Aallaqqaammut Inatsisartut Peqqussusiarisimasaat 2002-meersoq, taamaalillunilu allannguut 2003-meersoq, Inatsisartut Peqqussutaat nr. 12, 19. november 2007-meersoq malillugu atorunaarsimasut pineqartumi inatsiseqarnerup misissornerani paasineqarpoq.”*

.....

*Immikkoortumi siullermi tunngavilersuut malillugu niuernermi akigititaq illup qanoq issusia tunngaviginagu siunnersuut tunngaviusumik aallaaveqartoq isumaqarnarpoq. Tamanna itisilertariaqarpoq, taamaattoqarsinnaappallu uppersarnerarluni.*

*Aamma immikkoortut aappaanni inerniliunneqarpoq, “siunissamat pitsaasumik aningaasaliinertut isigineqarsinnaanngitsoq” inissiaq niuernermi akigititaq malillugu pisiarigaanni, inissarsuaq pineqartoq 1970-ikkunni sananeqarsimappat. Taamatut inerniliineq soqutiginartorujussuuvog nutaamillu eqqarsarnerulluni, ersarissumillu uppersaateqarnikkut isiginneriaatsip ilumoortuuneranut iluaqutaasumik assortorneqarsinnaalluni.”*

Siusinnerusukkut Inatsisartut peqqussutaanni malittarisassanut atatillugu INI A/S-ip oqaaseqaataanut tunngasunut, Ataatsimiititaliap siunnersuummik suliaqarnermini aallaqqaasiullugu oqaaseqaatini innersuussutigissavai, erseqqissaatigalugulu Inatsisartut peqqussutaat pineqartoq atorunnaarsinneqarsimasoq Ataatsimiititaliap arajutsisimanngimmagu. Tamatuma saniatigut Ataatsimiititaliap malugisinnaavaa, siunnersuummi oqariartuutit tunngaviusullu arlallit itisilertariaqarnerat uppersarnerarluni INI A/S-imit isumaqarfigineqarmat, ilaatigut niuerutigalugu naligititami inip pitsaassusia aallaavineqanngimmat, kiisalu inissiat 1970-ikkunni sananeqarsimasut 2,4 mio. kr.-it nalinganut pisiarinerat aningaasaliissutitsialaanaviannngitsoq. INI A/S-ip tusarniaanermut akissutaa tusangiasaarutitut taamaallaat paasineqarsinnaasoq Ataatsimiititaliaq isumaqarpoq, tamannalu tunngavigalugu maluginiarlugu

aalajangiiffigisassatut siunnersuummi uani tunngavilersuutitut isiginneriaatsitullu taasat INI A/S-ip isumaqatiginngikkai.

### **Qeqqata Kommunia**

Qeqqata Kommuniata tusarniaanermik akissutimini ilaatigut niuerutigalugu naligititaq malillugu inissiap nalingata aalajangerneqartarneranik misilittakkani isummersornermini tunngavisigimavai. Kommuni ilaatigut allappoq:

*“Qeqqata Kommunia isumaqarpoq, tuniniaanermi akiusunut avataanit siunnersuutit attartortunut tuniniaanerup aallartinninnerani illuutininik ilisimannittunit sioqqutsilluni piniaqartartut illup pineqartup taknikkikkut aningaasatigullu nalinganik aallaaveqartartut. Ineqarnermut, Attaveqarnermut Angallannermullu Naalakkersuisoqarfik inissianik attartornermi akiliutit naatsorsornerat pillugu ilitsersuummi ima taasaqarnikuvoq: ”Teknikkikkut-aningaasatigut naliliineq illuutigisap sumi inissisimanera alianaassusialu isiginiarnagu maanna nalinganut naleqqersuunneqarsinnaavoq.*

*Aammattaaq kommuni isumaqarpoq, inatsisit maanna atuuttut malillugit attartortup niuernerme akitigititaq naleqquutooq naatsorsuutigisinnaagaa, tassanilu illup aserfallassimanera, pisoqaassusaa, inissisimanera aamma alianaassusiala nalinga naleqquttumik mianerineqartoq. Niuernerme naligititami tassani tamatuma saniatigut 35 %-it angullugit pisoqaassusaanut akikilliliisoqartarpoq, piseratarsinnaasoq attartortutut qanoq sivilisutigisumik nalunaarsorneqarsimanera apeqqutaatillugu.*

*Arajutseqqunngilarpulli ukiuni Inatsisartut Peqqussutaata nr. 12-p, 19. nov. 2007-imeersup akuerineqarnissaata tungaanut ”Attartortumit Piginnittuunermit” aaqqissuussineq malillugu taamanikkut malittarisassat malillugit tunianiaanermut akigititap nalilerneqarneratigut kommunimit illuutininik arlalippassuarnik tuniniaanernik ingerlatsisoqarsimammat. Piffissami 19. nov. 2007-ip kingorna tuniniaaneq tamanna annikilliaratorujussuarsimavoq.”*

Ataatsimiititaliap malugisinnaavaa, inatsisit atuuttut malillugit Qeqqata Kommuniani inip aserfallatsaaliilluni pitsaassusia, pisoqaassusia, inissisimanera alianaassusialu apeqqutaatillugit piviusorsiorlumik ini/inissiaq nalilerneqartartoq. Taamaattorli kommunip oqaatigaa inatsisit atuuttut 2007-imi atulernerisa kingorna attartortumit piginnittumut aaqqissuussineq malillugu tuniniaaneq annikilliaratorsimasoq. Ataatsimiititaliaq isumaliutissiisummi siusinnerusukkut nassuiaanikuvoq, pisortat inissiaataannik tuniniaanerit piffissap ingerlanerani allatut ajornartumik annikilliaratorsinnaasut, taamaattumillu isuma tamanna annertunerusumik oqaaseqarfigineqassanngilaq.

### **Grønlands Ejendoms kontor**

Grønlands Ejendoms kontorip tusarniaanermik akissummini illoqarfinni assignnngitsuni ininik/illunik nioqquteqarnerit immikkut isummersorfigisimavai. Peqatigitillugu Grønlands

Ejendomskontor, tuniniaanermi akiusup aalajangersarneqarnerani tunngaviusoq allannngunngikkaluarlugu inissianik attartortut inissiat attartukkatik pisariassallugit qanoq annertunerusumik pilerisaarneqarsinnaanersut siunnersuuteqarpoq.

Grønlands Ejendomskontor ima oqaaseqarpoq:

*“Siunnersuummut tunngavilersuutitut taaneqarpoq, inissaaleqineq pissutigalugu akıt pissusissamisunngitsumik qaffasissuusimasut. Tamanna taamaallaat Nuummi atuuppoq, naak pissusissamisunngitsumik qaffasissumik akıgıtıtanut taarsıullugu illunik/inınik niuerneq ingerlalluartoq nammıneq taarusukkaluarlugu. Tamatumani pisortanit imaluunniıt nammınerısamık niueruteqarnerıt immıkkooortıkkumınaapput.*

*Kalaallıt Nunaanni nuna tamakkerlugu maleruagassat assıgıt, taamatuttaaq ıneqarnermut tunngasunı amerlasuunı, ajornakusoorluınnarput. Maleruagassat immıkkooortıtaartıneqartarıaqarput, sulıamullu aamma sumıssutsımut atatıllugu pineqartunı ataasıakkaanı naalakkersuınikkut angunıakkat naleqqussarneqartarıaqarlutık.”*

....

*“Sumııffınnı qulaanı pineqartunı tamanı attartortumıt pıgınnıtımmıt aaqqıssuusınermut atatıllugu illıt niuerutıgalugu akıusup aalajangersartarneramıt akuusarnıkuuvunga. Malugıniarnıkuuara niueruteqarnermı akıgıtıtıp aalajangerneqartarnera mıanersuunneqartartoq. Anıngaasatıgullu pısarıaqartıtsınermı aamma pısisup aserfallatsaalıınermut naammagıartumılu pıffıssaqartıneqarlunı nalıkillılıııssamıt aamma perıarfıssaqartassaaq, taamaalıllunı kınusınerusukkut pıgısap aalaakkasup tunıniarnıssaanut pısisoq akıtsorıartornerıt aallaavıgalugıt anıngaasannanıuteqassannıgımmıt.*

*Tunıniiaanermı akıgıtıtamıt tunngavıusup aalajangertarneranut taarsıullugu, immaqa tunıniiaanermık akıkillısaasınerup aaqqııvıgıneqarnıssaa naleqquttuusınaavoq, soorlu tamanna peqqussumı § 11, imm 2-mı perıarfıssaareersoq.*

*Qulaanı sumııffımmı IV-mı illunıt amerlanernıt atatıllugu “takussutıssatıt” tunıniiaanermı/niurutıgalugu akıgıtıtıp aalajangerneqartarnera aqutsınikkut ajornannıgıkanıerısumık maleruagassıuunneqarsınaavoq “pıssusıssamısoortumık” akıgıtıtıtıt aalajangersarılugu.”*

Tamanna tunngavıgalugu Ataatsımııtıtalıap paasınaavaa, Grønlands Ejendomskontor ısımaqartoq, pıssusıssamısuunngıtsumık akeqartıtsınermut sanıllıullugu Nuummı ıııık nıoqquteqarneq ingerlalluartoq. Peqatıgıtıllugu sulıffeqarfık ısımaqarpoq, niuerutıgalugu akıgıtıtıp mıanersortumık aalajangersarneqartartoq, ılaatıgut aserfallatsaalııneq aamma naammagıartumık pıffıssap ingerlaneranı nalıkillılıııneq mıanerıneqartarmata. Kıısalu

Ataatsimiititaliap maluginiarppaa, Inatsisartut peqqussutaanni § 11, imm. 2 naapertorlugu tuniniaanermi akiusup appartinneqarnissaanut periarfissap iluarsissutitut inigisap tuniniarneqarnerani attartortunut pilerisaarutaasinnaasoq. Inissianut/illunut “sumiiffimmi IV-mi illoqarfinnut allanut” atatillugu niuerutigalugu akigititap piumasaqaatitaqannginnerusumik aalajangerneqartarnissaanut maleruagassiortoqarsinnaavoq.

### **Tusarniaanermi akissutit ataatsimut isigalugit**

Tusarniaanermik akissutit tunngavigalugit Ataatsimiititaliap ataatsimut isigalugu malugisinnaavaa, naleqqutinngitsunik sunniutissanillu imaannaanngitsunik pingaaruteqartunillu siunnersuut nassataqartoq tusarniarneqartunit tikkuarneqartoq, kiisalu siunnersuutip piviusunngortinnerani sunniutissatut siunertarineqartut imaassinnaasoq anguneqanngitsoortut. Tamatumunnga atatillugu oqaatigineqarsinnaavoq maanna illunut piginnittuusut pigisat nalingat sinnerlugu akiitsoqalersinnaasut, tamatumalu kingunerisaanik illuutiminnut pituttorneqarlutik, aningaasatigullu annaasaqarnissaq aarleqqutigisinnaassagaat, kiisalu illumik pisiaqarnermi nalornisitsineq annertoq pilersinneqassasoq, aamma naalakkersuinikkut allannguinerit pissutaallutik illut nalinganit naleqartut annertoqisut annaaneqarsinnaasut. Peqatigitillugu aningaasalersuisut Kalaallit Nunaannit peerussinnaanerat siunnersuutip kingunerisinnaavaa, tamannalu illunik/inissianik nutaanik sanaartukkanut aningaasalersuinerit ajornakusuulernerannik kinguneqassaaq, taamaalillunilu kommunit aamma Namminersorlutik Oqartussat inissianik/illunik kisimik sanaartorsinnaalissapput. Tamatumunnga atatillugu Ataatsimiititaliap aamma oqaatigissavaa, aningaasalersuisartut Kalaallit Nunaaniikkunnaarisa kingunerisinnaammassuk, Alcoamik suliniuteqarnermut atatillugu OPP-mik aningaasalersuinerit periarfissaajunnaarnissaat. Aammattaaq siunnersuutip kingunerissavaa attartortunut sumi najugaarneq apeqqutaatillugu assigiinngisitsisoqassammat. Assersuutigalugu Nuummi ilanngaatisat peereerlugit nalinga tunissutigineqartassaaq, kisiannili illoqarfinni allani attartortut init attartukkatik niuerutigalugu nalingat sinnerujussuarlugu akiliillutik pisisariaqartassallutik. Kiisalu siunnersuutip piviusunngortinneqarnerani sunniutaasussat nassataasa ilagissavaat namminerisamik sanaartornerup uninnissaata naatsorsuutigineqarsinnaanera, kiisalu sanaartornermik ingerlatsivinni annertunerusumik suliffissaarusimaneq aamma ilinniarfissanik annaasaqarneq.

### **3.3 Apeqqutit**

Siunnersuutip Ataatsimiititaliamit suliarineranut atugassatut apeqqutit arlallit akineqarnissaannut Ataatsimiititaliap Naalakkersuisut qinnuigisimavai. Ataatsimiititaliap apeqqutaasa Naalakkersuisullu akissutaasa assilineri isumaliutissiisummut uunga **ilannussaq 2-tut** tapiliunneqarput.

### 3.4 Isumasioqatigiinneq

Ataatsimiititaliap siunnersuummik suliaqarneranut atatillugu Ineqarnermut, Attaveqarnermut Angallanermullu Naalakkersuisoq Ataatsimiititaliamit isumasioqatigineqarpoq. Isumasioqatigiinnissamut aggeqqusissutip aamma Naalakkersuisunut ilaasortap oqaatigisaanut tunngavissiap assilineqarneri isumaliutissiisummut uunga **ilannugssaq 3**-tut tapiliunneqarput.

Ilannugssaq 3 naapertorlugu Naalakkersuisut erseqqissaatigaat, oqaaseqaatit arleqqutigineqartullu Grønlandsbankenip tusarniaanermit akissummini taasai isumaqatigalugit. Siunnersuut akuerineqassappat aningaasalersuiffiit Kalaallit Nunaani niuernermit aningaasalersuiinnarnissaat qularnartoq Grønlandsbankenip oqariartuutaa Naalakkersuisut immikkut maluginiarsimavaat.

Ataatsimiititaliap ilaatigut Naalakkersuisut qinnuigisimavai, ineqarnermut inatsiseqarneq qanoq aaqqissuuteqqinneqarsinnaanersoq paasissutissiisutigin eqassasoq, taamaalillutik attartortut init attartukkatik pisiarissallugit annertunerusumik kaammattorneqarsinnaallutik. Naalakkersuisut tamatumunnga akissuteqarput, ineqarnermut akiliut akiviusut tunngavigalugit aalangersarneqartarnissaat siunniunneqartoq. Attartornermut akiliutit qaffanneqarpata, tamanna attartortunut inimik attartukkamik namminerisamik pisinissamut aningaasaqarnikkut taamaalilluni kaammattuutaasinnaavoq. Inissianik attartornermut akiliutit qaffasinnerunerisa kingunerisaanik Naalakkersuisut suleqatigiissitaliorsimapput, ineqarnermut tapiissutit pillugit aaqqissuusseqqinnissamut siunnersuusiortussanik. Naalakkersuisut isumaqarput, attartortumit piginnittuunermut aaqqissuussinermik allannguinnissaq pisariaqanngitsoq.

### 3.5 Grønlandsbankenip ataatsimeeqatiginera

Ataatsimiititaliap suliarinninnerminut atatillugu ulloq 20. november 2012 Grønlandsbankenimik ataatsimeeqateqarsimavoq. Siunnersuutip piviusungortinneqarnerani Grønlandsbankenip tusarniarneqarnermini akissuteqaatimini sunniutaasussatut taasai isummorsorfigineqarnissaat ataatsimiinnermi siunertaavoq. Grønlandsbankenip immikkut erseqqissaatigaa, siunnersuut akuerineqassagaluarpat pigisat nalingat sinnerlugu inuit amerlasuut akiitsoqalernissaat sunniutaasinnaasoq. Allatut oqaatigalugu illunut akiitsut ilanngaattissat peereerlugit illup nalinganit annertunerulissapput, tamannalu illuutillit illuminnik tuniniaasinnaanannut ajornartorsiutaalissaaq, tamatumalu kingunerisaanik illuminnut pituttussallutik. Peqatigitillugu Grønlandsbankenip erseqqissarpaa, maleruagassiornerit taamaattut siunnersuuteqartunit kissaatigineqartut mianersuutigineqartorujussuussasut, realkreditimik aningaasalersuisarfiit tassangaannartumik naalakkersuinikkut maleruagassiornerit pitsaanngilluinnartutut isigisarmatigit, taamaalillunilu Kalaallit Nunaanni aningaasalersuinnermut realkreditimik aningaasalersuisarfiit peqataajunnaarsinnaanerit annertuumik aarleqqutigineqarsinnaalluni. Aammattaq Grønlandsbankenip erseqqissaatigaa, siunnersuut akuerineqassappat, tamanna

illoqarfinni angisuuni attartortunut ilanngaait peereerlugit naleqartitat tunissutiginerannik kinguneqassamat. Namminerisamik pisortanillu inissianik nioqquteqarnerit akitigut ineriartornerat aamma Grønlandsbankenilu isummersornermut ilaapput.

### **3.6 Siunnersuutip aningaaitigut kingunerisassai**

Inatsisartut Suleriaasianni § 33, imm. 1-imi takuneqarsinnaavoq, aalajangiiffigisassatut siunnersuutip piviusunngortinnerani siunnersuutip tunngavilersuutitaani aningaasatigut allaffissornikkullu kingunerisassai allaaserineqassasut.

Ataatsimiititaliap maluginiarpaa, tamanna naapertorlugu siunnersuutip piviusunngortinnerani aningaasatigut kingunerisassatut naatsorsuutigineqartut siunnersuuteqartunit taaneqarsimasut. Taamaattorli tusarniaanermi akissutini taaneqartut tunngavigalugit, siunnersuutip piviusunngortinnera siunnersuuteqartunit naatsorsuutigineqartumiit innutaasunut, pisortanut aamma suliffeqarfinnut aningaasatigut annertuneroqisumik kinguneqarnissaata naatsorsuutigisariaqarnera Ataatsimiititaliap maluginiarpaa. Saqqummiunneqartulli tunngavigalugit aningaasatigut kingunerisassat tamakku sukumiisumik nalilissallugit Ataatsimiititaliaq periarfissaqanngilaq. Taamaattorli malugineqaannarsinnaavoq, tusarniaavigineqartut tamanna ilungersunartorujussuutut oqaatigimmasuk.

Ataatsimiititaliap siunnersuutip uuma iluaqutissartai akornutissartaalu sukumiisumik oqimaalutarsimavai. Maanna illunik/inissianik piginnittuusunut, pisortanit aamma namminersortunit inissianik/illunik nioqquteqarnermut, aningaasalersuiffinnut, sanaartortunut kiisalu attartortunut inip attartukkap pisiarinissaanut kisaateqartunut nunami sumiinnera apeqqutaatillugu sunniutaasussatut assigiinngitsut siunnersuutip piviusunngortinnerani sunniutaasinnaasut Ataatsimiititaliap immikkut isummersorfigalugillu immikkut nalilersorsimavai. Ataatsimiititaliap isummersornermini ineqarnermi malittarisassiorneq mianersortumik peqqissaartumillu isumaliuteqarnikkut pisassasoq immikkut eqqumaffiginiarsimavaa, inuit amerlasuut aningaasaqarnertik aqqissuuttarmasuk sinaakkutissatut piumasarisaasut allannguuteqannginnissaat tatigalugu.

### **4. Ataatsimiititaliap inaarutaasumik oqaaseqaatai**

Siunnersuuteqartut siunertatut taasaat, tassaasoq inuiaqatigiinni isertitakinnerpaat iniminnik nammineq piginnittuulernissamut periarfissaqarnissaannut suliniuteqarnissaq Ataatsimiititaliap iluarisimaartorujussuuaa. Tamanna ineqarnikkut isumaginninnermut anguniagassatut tapersersornartutut Ataatsimiititaliap isigaa. Ataatsimiititaliaq ataatsimut isigalugu isumaqarpoq, taamatut anguniagaqarnerup suliniutigineqarsinnaaneranut iliuusissat pisariaqartinneqartut.

Taamaattoq siunnersuutip siunertaata tapersersornartinneqarnera ima paasineqassanngilaq siunnersuut tapersersornartinneqartoq. Taamaattorli Ataatsimiititaliaq ataatsimiititaliatut



akisussaassuseqartut aamma sunniutissat pitsaanngitsut isiginiartariaqarpai, tamatumani siunnersuut immikkut isigalugu tapersorsornartutut isikkoqaraluarpalluunniit. Tamanna tunngavigalugu siunnersuutip tusarniarneqarnerani siunnersuummik isumaqatigiilluinnangajalluni itigartitsinermik taasat Ataatsimiititaliap isiginngitsuusaarsinnaanngilai. Ataatsimiititaliap nassuerutigisariaqarpaa, inuit ikittunnguit inissiamik akikitsumik pisinissamut periarfissinneqarnerat siunertamut naleqqutuunngitsoq, tamatumani inunnut amerlanernut kiisalu nuna tamakkerlugu ajoqutaasinnaasumik iliuuseqartoqassappat.

## 5. Ataatsimiititaliap inassutai

Amerlanerussuteqartut Inuit Ataqtatigiinneersut, Demokraatineersut aamma Kattusseqtatigiit Partiianeersaq siunnersuut itigartinneqassasoq inassutigaa.

Ikinnerussuteqartut Siimeersut siunnersuut pillugu ima oqaaseqassapput.

“Politikkikkut qangali kissaataavoq innuttaasut akissallit amerlanerpaartaasa namminneq pigisaminnik angerlarsimaffeqalernissaat. Ullumikkulli Inatsisartut peqqussutaat nr.12, 19.november 2007-imeersoq taamatut isikkoqartillugu, attartortut amerlanerpaartaasa inigisaminnik piginnittuulernissaat angusinnaanngikkippat uppernarsarneqareerpoq.

Sunilluunniimmi nalilinnik pitaarniaraangatta nioqqutissap pitsaassusaa aallaavigalugu aaliangertarpugut ilumut pisiariniagarput akiminut naapertuunnersoq. Aamma tamanna inissianik illunillu pisiniarnermi atuuppoq.

Ullumikkut Peqqussut atuuttoq malillugu, illoqarfinni anginerni sisamaasuni attartukkap pisiarinissaanut pilerinassuseq annikitsuararsuuvoq, akerlianik pisisutut aningaasanik annaasaqarnissaq qanittuarakasiuvoq, pissutigalugu inissiap/illup pitsaassusaa qaangerujussuarlugu aningaasanik attartortariaqartussaasarmata.

Siunnersuut pillugu Ataatsimiititaliamiit tusarniaanermi GrønlandsBanken-ip akissutaa atuaannarlugu tupannarsinnaavoq toqqasassineqartutullu misigisimanarsinnaalluni. Kisianni atuarluaqqinnerani aammalu GrønlandsBanken-imiit atorfilittamik Ataatsimiititaliamiit naapitaqarnitsinni, paasinarsivoq tusarniaanermi akissutigineqartut ernumanissatsinnut pissutissaqanngitsugut. Pissutigalugu Bankip ernunanartutut oqaatigisai pillugit, Siumumit apeqqutigut annerusumik tigussaasumik tunngavilersorluakkamillu akineqanngitsutut Siumumiit nalilerpagut.

Assersuutigalugu itigartitsinissamut tunngavilersuutigineqartut pingaarnersaat eqqarsaatigalugu, GrønlandsBanken-ip oqaatigivaa siunnersuut akuersissutigineqarnerata kingunerissagaa, illoqarfinni anginerni privat-imik illusisariaqarsimasut illusiaasa nalingat appassasoq allaat ima appartigisinnaasoq pigisat nalingat sinnerlugu akiitsoqartoqalersinnaalluni.

Taamatut isumaqarneq, siusinnerusukkut misilittakkat aallaavigalugit Siumumiit isumaqatiginngilarput. Nalunngilarpummi 2008 sioqqulluguli inissiat/illut pingaartumik Nuummi akii ingasagineqarsinnaasumik qaffakkiartulereersimasut, naak taamanikkut teknikkikkut pitsaassusaat aallaavigalugu akilersorneqartaraluartut. Taamaattumik oqartoqarsinnaanngilaq peqqussutip allanngortinneratigut privat-imik inissiat pigineqartut nalingat appassasut. Akit taamak qaffasitsiginerannut peqqussut peqqutaanani inissaaleqinerujussuaq peqqutaasoq Siumumi isumaqarpugut.

GrønlandsBanken-ip Naalakkersuisooqatigiillu tamatumunnga ernummatigisaat ullumikkut Peqqussut atuuttumut ernumassutigissallugu tulluarnerugaluartoq isumaqarpugut.

Taamatutaaq tupigusuutigaarput GrønlandsBanken-ip ullumikkut aaqqissuussineq atuuttoq malillugu, niueruteqarnermi akigitineqartut pissusissamisoorlutut oqaatigimmagit. Siumumimi isumaqanngilagut, siunnersuutitsinni assersuutigisarput eqqarsaatigalugu, Radiofjeld-imi inissiat 1970-ikkunni sanaat 2.4mio.kr.-lerlugit Pisortanit attartortunut tuniniarneqartut akii pissusissamisooruusut. Akerlianik isumaqarpugut akit ingattarserpallaartut aammalu aningaasanik inuttut annaasaqarnissamut aarlerinaateqarpallaartut.


Siumumi maluginiarparput DLR Kredit aamma Nykredit siunnersuutitsinnut toqqaannartumik qisuaariaateqarsimannngitsut, aatsaalli GrønlandsBanken-imiit attaveqarfigineqareernemik kingorna Ataatsimiititaliamut allagaqarsimasut, tamannami takuneqarsinnaavoq pineqartut allagaanni.

Nunatta avataaniit aningaasaliisartut ”qimaanissaannut” tunngatillugu oqaatigissavarput, Real Kredit nunatsinni inissianut nammineq pigisassanut taarsigassarsiaritissimasaat ukioq 2000-imi 400 mio.kr.-init 2008-imut 1.4 mia.kr.-inut, tassa pingasoriaatinngorlutik qaffassimmamata, naak taamanikkut inissiat/illut teknikkikkut pitsaassusaat aallaavigalugu nalilerneqartaraluartut.

Taamatutaaq Naalakkersuisut itigigartitsinerminni tunngavilersuutaasa ilagivaat, inuiaqatigiinngooq pigisaat isumatusaartumik nalitunerpaamillu akilersillugit tunineqarnissaat soqutigisarigamikku. Taamatut oqarneq kukkuneruvoq. Tassami nunaqarfinni illoqarfinnilu isorliunerusuni inuiaqatigiit pigisaat inissiat/illut teknikkikkut nalingat ataaterujussuarlugit akilersillugit tuniniartareerpaat.”

Tamanna tunngavigalugu Ataatsimiititaliami ikinnerussuteqartut siunnersuut akuerineqassasoq inassutigaa.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappasaaniigassanngortippaa.



---

Juliane Henningsen  
Siulittaasoq



---

Kim Kielsen




---

Andreas Uldum



---

Malik Berthelsen



---

Storm Ludvigsen



---

Anders Olsen



---

Knud Fleischer



INATSIARTUT

ILANNGUSSAQ 1

Tusarniaaffigineqartunut tamanut,  
tusarniarneqartut pillugit allattukkat malillugit.

Ulloq: 25. okt 2012

J.nr.: 01.37.01.03-00069

**UKA 2012/55 pillugu tusarniaaneq - Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata nr. 12, 19. november 2007-imeersup kingusinnerpaamik UPA 2013-imi allangortinneqarnissaanik, Naalakkersuisut peqquneqarnissaanik aaliangiiffigisassatut siunnersuut. Taamaaliornikkut inissiap attartukkap pisiarissallugu kissaatigineqartup akia niuernermit akigititaasut tunngaviginagit, taamaallaat teknikikkut aningaasatigullu inissiap akia naapertorlugu aalajangersarneqartalersillugu.**

Inatsisartut Sanaartornermut Avatangiisinullu ataatsimiititaliaat sinnerlugu - UKA 2012/55 – aalajangiiffigisassatut siunnersuut ilanngussaq tusarniaassutitut nassiunneqarpoq, qinnutigineqarluni oqaasertaliunneqaratarsinnaasut **ulloq 8. november nallertinnagu** nassiunneqassasut, mailikkullu nassiunneqarsinnaavoq uunga: [rikke@inatsisartut.gl](mailto:rikke@inatsisartut.gl), imaluunniit Sanaartornermut Avatangiisinullu ataatsimiititaliaq, c/o Inatsisartut, Postboks 1060, 3900 Nuuk.

Tusarniaarnermi akissuteqartarneq piumassuseq malillugu ingerlanneqartarpoq, tusarniaanermilli akissutit tamarmik Ataatsimiititaliamit iluarisimaarneqassapput, taamaalillutik tamakku siunnersuutip isumaliutigeqqinnerani ilanngunneqarsinnaammata. Tusarniaanermi akissut kalaallisut aamma/imaluunniit qallunaatut tunniunneqarsinnaavoq.

#### **Tusarniaanermut tunngaviusoq:**

Ataatsimiititaliap maluginiarpaa, Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaat nr. 12, 19. november 2007-imeersoq malillugu, inissiap attartortittakkap, inissiatut imaluunniit illutut nammineq pigisatut tiguneqartussatut kissaatigineqartup, tunineqarnerani akia niuernermit naligititaasut naapertorlugit aalajangerneqassasoq.

Malittarisassanut atuuttunut naleqqiullugu aalajangiiffigisassatut siunnersuutip taamatut isikkoqartillugu akuernerata kingunerissavaa, Namminersorlutik Oqartussat aamma kommunit inissiaataasa attartortittakkat perusunneqartut tuniniaanermi akii, inissiap


nalingata teknikkikkut aningaasaqarnikkullu nalinga tunngavigalugu aalajangerneqassasut.

Ataatsimiititaliap maluginiarpa, siunnersuuteqartut paasinninnerat malillugu, inatsisartut peqqussutaata maanna atuuttup 2007-mi allangortinneqarnerata kingorna, pisortat inissiaataannik niuernermit akitigut ineriartorneq qaffakkiartorsimasoq, taamaalilluni inissiap attartortittakkap inissiatut imaluunniit illutut nammineq pigisatut pisiariniarneqartup tuniniarneqarnerani akia, niuernermit akigititaq tunngavigalugu aalajangerneqartartoq siunnersuummi ilaatigut tunuliaqutaasoq. Peqatigitillugu siunnersuuteqartoq isumaqarpoq, inissaaleqinerujussuaq pissutaalluni pissusissamisuunngitsumik akit qaffasitsinneqarpallaartut. Siunnersuutip suliarineqarnerani Ataatsimiititaliamit atugassatut pisortat namminersortullu inissiaataannik niuernermit ataatsimut isigalugu akitigut ineriartorneq pillugu tusarniarneqartut oqaatigeratarsinnaasaat Ataatsimiititaliamit takorusunneqarput.

Ilisimatitsissutigineqassaaq, aalajangiiffigisassatut siunnersuut taamatut isikkoqartillugu akuerineqassappat, taava tamatuma kingorna Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaanut nr. 12-mut, 19. november 2007-imeersumut allanguutissatut siunnersuummik Naalakkersuisut saqqummiussinissaminnut pisussaassammata. Inatsisip atuuttup allangortinnissaanut siunnersuut pisarnertut attuumassutilinnut tusarniaassutigineqartussaassaaq.

Aalajangiiffigisassatut siunnersuummi sinaakkusiussat tunngavigalugit aalajangiiffigisassatut siunnersuutip uuma suliarinerata ingerlaqqinnerani Sanaartornermut Avatangiisinullu ataatsimiititaliaq allanguutissatut siunnersuummik saqqummiussinissamut periarfissaqassaaq.

Ataatsimiititaliaq sinnerlugu



Juliane Henningsen

Ataatsimiititaliami siulittaasoq

INATSIARTUT NUTSERIASOQARFIANIT NUTSIGAQ  
SANAARTORNERMUT AVATANGIISINULLU ATAATSIMIITITALIAMI  
ATUGASSIAQ  
NUTSERNERA NASSITSISUMIT AKUERISAANNGILAQ

**GrønlandsBANKEN**

Kreditafdelingen  
Postboks 1033  
3900 Nuuk  
Tlf.: 70 1234  
Fax 34 7705  
[banken@banken.gl](mailto:banken@banken.gl)  
[www.banken.gl](http://www.banken.gl)

8. november 2012

Sanaartornermut Avatangiisinullu ataatsimiititaliaq

**Attartuunermut piginnittuunermut aaqqissuussinermi niueruteqarnermi naligitamit teknikikut-aningaasatigut akeqartitsisarnermut allanngineq pillugu tusarniaaneq.**

Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata nr. 12, 19. november 2007-imeersup kingusinnerpaamik UPA 2013-imi allanngortinneqarnissaanik, Naalakkersuisut peqquneqarnissaanik Inatsisartut aalajangiiffigisassaatur siunnersuut UKA 2012/55 nangillugu. Siunnersuutip siunertaraa, inissiap attartukkap pisiarissallugu kissaatigineqartup akia niuerneruteqarnermi akigititaasut tunngaviginagit, taamaallaalli teknikikut aningaasatigullu naliliineq tunngavigalugu inissiap akia naapertorlugu aalajangersarneqartalissasoq.

Tamatumunnga atatillugu Sanaartornermut Avatangiisinullu ataatsimiititaliaq aalajangersimavoq, aalajangiiffigisassatut siunnersuut UKA 2012/55 Kalaallit Nunaanni illunik niueruteqarnermi sulialinnut arlalinnut tusarniaassutiginiarlugu.

GrønlandsBANKEN-ip siunnersuut atitulluinnartutut nalilerpaa.

*Maanna illunik piginnittunut kingunissai*

Illuutillit maanna inatsisit atuuttut atorlugit pingaartumik illoqarfinni anginerni pisiaqarsimasut illutimik niueruteqarnermi nalinga appassasoq misigisinnaassavaat. Tamanna qularnanngitsumik illunik pisisut arlallit pigisap nalinga sinnerlugu akiitsoqalernerannik kinguneqassaaq. Pigisat nalingat sinnerlugu akiitsoqalernerneq illuutilinnut piviusumik pituttuinnermik kiisalu aningaasatigut annaasaqarnissamut aarlerinartorsiornermik kinguneqassaaq.

Kiisalu illunik/inissianik pisinermi sinaakkutissatut piumasaqaatinik allannginerit siunnersuummi taaneqartutut amerlanerit namminerisaminnik inissianik pisisinnaalersiinnarnagit, akerlinganik

namminerisamik illumik pisinissamat aatsaat nalornilersitsissapput. Tassanngaannartumik naalackersuinikkut allannguutissatut siunnersuutip illup/inissiap nalinganik ima annertutigisumik naleerussisisinnaanerani, tamanna nalorninermik pilersitsisinnaavoq, allaat namminerisamik pisisut attartortumit piginnittuulernerit imaluunniit namminerisamik ininik/illumik aamma pisinissat pisinngitsoortissinnaallugit. Oqaatigineqassaaq siunnersuutip namminerisamik illuutit tamarmik nalingat sunnersinnaammagu, taamaallaallu attartortumit piginnittuunermut aaqqissuussinermit inigisat/illuutit pinnagit. UKA 2012/55-imi oqaatigineqarpoq, namminerisamik illuutit akii pissusissamisuunngitsumik qaffasissuusut, aserfallassimanerillu il.il. ilaatinneqaratik. Taamaattorli niuerutigalugu naligititami illuutip pitsaassusia, inissisimanagera, taarsiullugulu illumik nutaamik sananermi akissaajatit sillimaffigineqassallutik.

Aningaaserivik naliliivoq, attartortumit pisisumut aaqqissuussineq maanna atuuttoq pissusissamisuunngitsumik niueruteqarnermi naleqartitsinermit kinguneqarsimanngitsoq. Attartortumit pisisumut aaqqissuussineq atorlugu Namminersorlutik Oqartussat inissianik atuisut annertunerusumik nammineerlutik aningaasalersuisinnaalernerat misilissimavaat. Tamannali oqaatigisariaqarpoq, inissianut/illunut aningaasartuutit pissusissamisuunngitsumik qaffasissutsimit naleqqunnerusumik qaffasissutsimut inissineqarsimasut. Kiisalu inissiamut/illumut aningaasartuutit ileqqaarutitaqartut isiginiarneqartariaqarpoq, inissiamimmi/illumik piginnittut akiitsuminnik akilersuitillutik akiitsut saniatigut naligititamik (ileqqaarnermik) pilersitsisarmata.

#### *Aningaasalersuiffinnut kingunissai*

GrønlandsBANKEN-imut pingaaruteqarpoq tikkuassallugu, Kalaallit Nunaanni inissianik/illumik aningaasalersuinermit sinaakkutissanik tassanngaannartumik allannguinerit aningaasalersuiffinnut (taarsigassarsisitsisarfinnut aamma aningaaserivinnut) Kalaallit Nunaanni namminerisamik illumik niueruteqarnermi annertunerpaamik aningaasalersuisartunut nalorninermik pilersitsissammata. Aningaasalersuiffit Kalaallit Nunaanni uninialernerannik imaluunniit aningaasalersuinerup annikillisinneqarnerannik imaluunniit Kalaallit Nunaanni aningaasalersinermit atatillugu killilersuinerulernerannik kinguneqarsinnaavoq. Kalaallit Nunaanni ingammillu illoqarfinni anginerusuni illumik/inissianik niuerneq tamatuma unitsissavaa.

Tamatuma saniatigut oqaatigineqassaaq, illut nammineq pigisat niueruteqarnermi nalingat apparpat, tamanna aamma aningaasalersuiffinnit illumut/inissiamut taarsigassarsissutaareersunut kisiannili aamma inissianut/illunut Namminersorlutik Oqartussanit illumut/inissiamut taarsigassarsisutaasunut annaasaqartitsinissamat aarleqquteqarsinnaanermik kinguneqarsinnaammata.

#### *Siunnersuutip inuuniarnikkut inuiaqatigiinnullu tunngasortai*

Siunnersuutip inuuniarnikkut inuiaqatigiinnullu tunngasortai pitsaanngitsut immaqqa allannguutissatut siunnersuummut ajornartorsiutaanerpaapput. Attartortumit piginnittuunermut maanna aaqqissuusinerup allanngortinneqarnera inuiaqatigiinni sanngiinnerpaanut iluaqutaanaviannigilaq. Akerlinganilli illuminnik/inissiaminnik nammineq aningaasalersuisinnaasut niueruteqarnermi piumasarsianut nalinginnaasumik akinik aalajangiinikkut akiliinissaminnut naleqqiullugu illumik/inissiamik akikinnerusumik periarfissisinnallugit.

Tamanna maannamut ajunngitsumik misissorneqarnikooqaaq. Aningaaseriviup assersuutigalugu “Naalackersuisut 2012-imi ineqarneq pillugu naalackersuinikkut ingerlatsinermit nassuiaataat” innersuussutigisinnaavaa. Tassani takuneqarsinnaavoq, ineqarnermi tapiissutinik aaqqissuussinerit peerneqarpata, akunnattumik isertitaqartartunut isertitaqqortuunullu akissaajaatit tunngaviusumik annertusissasut, taamaattorli isertitakitsunut ineqarnermit akissaajaatit allanngunngijjavissallutik.

Tamanna isertitakinnerusut (isumaginninnikkut pisartagallit il.il.) niueruteqarnermi piumasarisat imaluunnit teknikikkut-aningaasaqarnikkut naliliineq tunngavigalugit inigisamik/illumik aningaasalersuisinnaannginnerannik pissuteqarpoq. Kiisalu Akileraartarnermut Atugarissaarnermullu ataatsimiititaliarsuup ininik atuisut pisinnaagunik inimut akiviusoq, tassalu niueruteqarnermi akigititaq, akiliisarnissaannik inassuteqaataat tikkuarneqarsinnaavoq. Pineqannitsut taamaallaat tassani tassaapput isumaginninnikkut atugarliortut aamma isertitakinnerit.

Pisinermi akigititatut niueruteqarnermi naligititaq sanioqqunneqartillugu, tamanna illoqarfinni anginerni tunissutitut isigineqassaaq, tamannalu nunap sinnerani innuttaasunut naleqqutinngitsutut isumaqarnarsinnaassalluni. Tamanna illoqarfinni anginerni niueruteqarnermi naligititap annertungaarneranik pissuteqarpoq. Inissiat/illut attartortumit piginnittumut aaqqissuusinermit atatillugu tuniniarneqartut pisortanit aningaasalersugaapput. Attartortut nalaatsortumik pisortanit sooq "tunissutisissanersut" imaluunniit Nuummi inissianik/illumik nammineq pisigisanik akikitsunik Kalaallit Nunaanni inuiaqatigiit sinneruttut sooq aningaasalersuissanersut siunnersuummi saqqummiunneqartumi nassuiaatigineqanngilaq.

#### Illunik nutaanik sanaartornermut tunngasunut pissutsit

Allannguutissatut siunnersuummut tunngasuteqartoq tassaavoq, namminerisamik sanaartortitsisut illumik/inissianik nutaanik sanaartornermut aningaasalersuutissanik nassaarnissamut ajornartorsiorsinnaanerat. Illut/inissiat nutaat niueruteqarnermi nalingat nalornissutigaaanni, tamanna illumik/inissianik sanaartornissamut aningaasalersuutissanillu periarfissaqartitsinermit kajumissuseerutisisinnaavoq. Siunissami sanaartornerit tamarmik taamaallaat Namminersorlutik Oqartussanit kommuninillu ingerlanneqartalernissaannik tamanna kinguneqassaaq.

Namminersorlutik Oqartussat inissianik/illumik sanaareernikunik amerlasuunik niueruteqarnermi akigititamit annikinnerungaartumik tuniniaappata, inissianut/illunut teknikikkut-aningaasaqarnikkullu nalinga tunngavigalugu tunineqartup kvadratmeterimut akiata aamma illup/inissiap nutaap sananeqartup kvadratmeterimut akiata nikingassutaata, illumik/inissianik nutaanik sananeq imminut akilersinnaatissannginngilluinnarpaa.

#### Inerniliineq

GrønlandsBANKEN-imut pingaaruteqarpoq pisariaqartutut tikkuassallugu, Kalaallit Nunaanni illumik niueruteqarnermi piumasarisat atuuttut tamarmik siunnersuummi ilanngunneqarsimannimmata. Taamaalilluni tunisinermi akiusup teknikikkut-aningaasatigut aalajangerneqartarnerani pisisumut akikinnerulersitsinissaq taamaallaat isiginiarneqarpoq. Taamaattorli illumik/inissianik piginnittut attartortumit piginnittunngoreersut aamma illuminnik namminerisamik niueruteqarnermilu akigititaq tunngavigalugu pisisut siunnersuummi isiginiarneqanngillat. Inissianik/illumik pisisut tamakku pigisap nalinga sinnerlugu akiitsoqalernissaminnik aarleqquteqarsinnaapput.

Aammattaq allannguutissatut siunnersuummi aningaasalersuiffiit Kalaallit Nunaanni illumik niuerneq aningaasalersuinissaannik nangitsinissaat qularineqanngilaq, naak Kalaallit Nunaanni illut niueruteqarnermi nalingat pillugu annertuumik nalornisitsisoqaraluartoq. Taamaaliornissaat qularnarpoq.

Taamaattorli Kalaallit Nunaanni sualummik Nuummi inissaaleqisoqarneranik GrønlandsBANKEN-ip siunnersuuteqartut isumaqatigaat. Taamaattorli inissaaleqineq tamanna illut/inissiat pioreersut niueruteqarnermi akiusut ataallugit tuniniarneqarnerisigut ikiorserneqarnaviannngilaq, pisisut



tassaassammata attartortooreersut. Akerlinganilli akit appasinnerusut atorlugit tuniniaaneq illut/inissiat allat tamarmik akiisa appasinnerulernerannik kinguneqassaaq, immaqalu Kalaallit Nunaanni illunik/inissianik nutaanik sanaartornermi akiusunit appasinnerusumik akeqartitsinikkut.

Attartortumit piginnittumut aaqqissuussinermut allannguutissatut siunnersuut namminerisamik illuliortiternerit annertuumik annikillinerannik qularnanngilluinnartumik kinguneqassaaq, kiisalu inissialiortiternerit/illuliortiternerit pisortanit annertunerusumik ingerlanneqalerneranni aningaasatigut nammakkiutaassalluni. GrønlandsBANKEN isumaqarpoq, kalaallit inuiaqatigiit ineqarnermut aningaasartuutitut nammineerlutik annertunerusumik aningaasalersuisalernissaannut alloriarnissaaq pingaaruteqartuusoq. Siunnersuutip saqqummiunneqartup tamanna akornusersussavaa, GrønlandsBANKEN-ilu kaammattuuteqaannarsinnaavoq siunnersuut akuerineqassanngitsoq.

Inussiarnersumik inuulluarit  
**GrønlandsBANKEN**

(ats.)  
John Jakobsen  
Pisortap tullia

(ats.)  
Torsteen Overgaard  
Inatsisitigut sullissisoq

INATSIARTUT NUTSERIASOQARFIANIT NUTSIGAQ  
SANAARTORNERMUT AVATANGIISINULLU ATAATSIMIITITALIAMI  
ATUGASSIAQ  
NUTSERNERA NASSITSISUMIT AKUERISAANNGILAQ

Ulloq 8. november 2012

dlr kredit  
er kredit  
DLR Kredit A/S – CVR-nr. 25781309  
Nyropsgade 21 – 1780 København V  
Tlf. 70 10 00 90 – Fax 33 93 95 00  
[www.dlr.dk](http://www.dlr.dk) – [dlr@dl.dk](mailto:dlr@dl.dk)

Sanaartornermut Avatangiisinullu ataatsimiititaliaq

**Tusarniaanermut akissut – UKA 2012/55**

Qulaani taaneqartoq malillugu DLR-p Grønlandsbankenip akissutaa ilisimavaa,  
nalunaaritigineqarsinnaavorlu DLR Kreditip Grønlandsbankenip akissutai  
isumaqatigisinnaammagit.

Inussiarnersumik inuulluaritsi  
**DLR Kredit A/S**  
(ats.)  
**Bent Andersen**

INATSIARTUT NUTSERIASOQARFIANIT NUTSIGAQ  
SANAARTORNERMUT AVATANGIISINULLU ATAATSIMIITITALIAMI  
ATUGASSIAQ  
NUTSERNERA NASSITSISUMIT AKUERISAANNGILAQ

**Nykredit**

Sanaartornermut Avatangiisinullu ataatsimiititaliaq  
c/o Inatsisartut  
Postboks 1060  
3900 Nuuk  
E-mailikkut uunga nassiunenqarpoq: rikke@inatsisartut.gl

7. november 2012

**EM 2012/55 – Inatsisartut Peqqussutaannut nr. 12-mut, 19. november 2007-meersumut  
allannguutissatut siunnersuutip tusarniaassutiginera**

Nykredit A/S-ip tusarniarneqartutut GrønlandsBANKEN A/S-ip tusarniaanermi akissutaa ilisimavaa, siunnersuummullu qulaani taaneqartumut tamanna tunuliaqutaralugu uku erseqqissaatiginarlugit:

Nalinginnaasumik niueruteqarnermi naligitinneqartartoq tassaasarpog, Nykredit A/S-ip illuummik naliliinera qaffasinnerpaaq, Værdiansættelsesbekendtgørelse-t (Naliliisarnermi nalunaarutit) BEK 1148, 5. december 2005-imeersoq aamma BEK 687, 20. juni 2007-meersoq naapertorlugit.

Pineqartumi pigineqartut kiap piginerai apeqqutaatillugit pigisap niueruteqarnermi nalingata nalilernerani nalileeriaatsinik assigiinngitsunik marlunnik tunngaveqarnissaq annertuumik nalornissuteqarnermik kinguneqassaaq. Tamatuma tungaatigut sunilluunniit nalornissuteqarnerit nalunangilluinnartumik aningaasalersuinnermut ajortumik sunnuteqassapput.

Pigisaq attartortumit piginnittuunnermut aaqquissuussineq malillugu aatsaat ukiut arlallit qanngiunneranni tuniniarneqarsinnaaneranut piumasaqaat – siunnersuut qanoq timalernerneqarnerneq apeqqutaatillugu – qularnanngitsumik realkredit-imit taarsigassarsinertut akuerineqarsinnaanaviannigilaq, piumasaqaammi pigisap tuniniarneqarsinnaaneranut killiliissammat.

Kalaallit Nunaanni pigisanik nalilinnik niueruteqarnermi pingaarutilimmik akuusutut, siunnersuutip piviusunngornerani – malitsigisaanillu niueruteqarnermi naligititap kiisalu tuniniaasinnaanerup killilerneqarneranik nalornissuteqarnermi – Kalaallit Nunaanni aningaasalersueqataasarnitsinnut piumasaqaatit nalileqinnissaannut Nykredit pissutissaqalersinnaavoq.


Inussiarnersumik inuulluaqqusillunga

(ats.)

Anders Ørnstrup Rasmussen.

Nunap immikkoortuani pisortaq

Kalaallit Nunaat



**Kalaallit Nunaanni Sulisitsisut Peqatigiiffiat**  
**Grønlands Arbejdsgiverforening**

Jens Kreutzmannip Aqq. 3 | Postboks 73 | 3900 Nuuk | www.ga.gl  
Tlf. +299 32 15 00 | Fax nr. +299 32 43 40 | [ga@ga.gl](mailto:ga@ga.gl) | GER:25027248

Sanaartornermut Avatangiisinullu ataatsimiititaliaq Nuuk, den 1. november 2012  
e-mail: [lkri@inatsisartut.gl](mailto:lkri@inatsisartut.gl) Brev nr. D12-11281  
Sagsnr. S12-473

**INATSISARTUT NUTSERIASOQARFIANIT NUTSIGAQ**  
**SANAARTORNERMUT AVATANGIISINULLU ATAATSIMIITITALIAMI**  
**ATUGASSIAQ**  
**NUTSERNERA NASSITSISUMIT AKUERISAANNGILAQ**

**Illut/inissiat teknikikkut aningaasatigullu nalinganut tuniniarneqartarnerat pillugu aalajangiiffigisassatut siunnersuummut oqaaseqaatit**

Kalaallit Nunaanni Sulisitsisut Peqatigiiffiata inatsiseqarnerup allanngortinnissaanut aalajangiiffigisassatut siunnersuut tigusimavaa, taamaalilluni attartortut inissiat attartukkatik teknikikkut/aningaasatigut nallingannut niuernikkut nalivinianut maannalu nalinganut taarsiullugu pisiarinissaannut neqeroorfingineqassallutik.

**Siunnersuut piviusunngorpat, tamanna ininik niuernermut ajornartorsiutinik annertuunik kinguneqassaaq.**

**1.**

Niuernermi maanna akigititat assersuutigalugu Nuummi teknikikkut/aningaasatigut nalinga amerlasuutigut qaangertassavaat, taamaattorli illoqarfinni allani teknikikkut/aningaasatigut nalingata niuernikkut nalinga amerlanertigut qaangertassallugu.

Taamaalilluni siunnersuut nunami attartortunut naapertuilluanngilag, assersuutigalugu Nuummi attartortut akiitsutit pinnagit nalinga pisassagamikku, taamaattorli illoqarfinni amerlanerni allani attartortut initik attartortakkat illoqarfimmini niuernermi akiviusoq qaangingaarlugu pisiarisariaqartassallugit. Taamaalillutik attartortut tamakku kingornatigut initik nammineq pigisatik tunissagunikkut annaasaqartariaqassapput.

**2.**

Kalaallit Nunaannut pingaaruteqarpoq, kiffaanngissuseqarluni akinik pilersitsisarnerup aalajangiusimanissaa, niuffaffillu pisortanit piviusorsiunngitsumik akuliunnikkut sunnerneqassanngitsoq.

Kiffaanngissuseqarluni akinik pilersitsisarneq innarlerneqarpat, illunik/inissianik pisisunut tunisisunullumi toqqissisimanginerujussuarmik kinguneqassaaq, niuernermilu naliusut ilaatigut Nuummi maanna illunik/inissianik piginnittuusunut taarsigassarsisitsisunullu annertoqisumik annaasaqarnissaaq aarleqqutaassaaq.

Aningaaseriviit taarsigassarsisitsisarfiillu tamanna tunngavigalugu maanna inissianut peqqinnartumik taarsigassarsisitsisarneq neqeroorutigisinnaajunnaassavaat, tamatumani lu niuernermi naligitat suli naqinneqaraluttuinnassapput.

**3.**



Sanaartortitsisut namminersortut illunik/inissianik nutaanik sananermi aningaasalersuinissamut periarfissaaleqilissapput, siunnersuut taamaattoq akuerineqarpat illut/inissiat nutaat niuernermit akiat nalornissutigineqalissammat. Tamatuma inissianik/illunik nutaanik sanaartorneq aningaasalersuinissamullu periarfissiineq pilerinartuutikkunnaassavaa. Siunissami inissianik/illunik sanaartornerit tamarmik taamaallaat Namminersorlutik Oqartussanit kommuninillu ingerlanneqartalernerannik kinguneqassaaq.

### **Inerniliineq**

Kalaallit Nunaanni Sulisitsisut Peqatigiiffiata aalajangiiffigisassatut siunnersuut tapersersinnaanngilaa, **kiffaanngissuseqarluni akinik pilersitsisinnaanerup attatiinnarnissaa pingaaruteqarluinnarmat**, kiisalu pisortat inissiaataannik/illutaannik attartortunut tuniniaaneq aamma **illoqarfinni assigiinngitsuni innuttaasut periuseq naapertuilluartoq malillugu pisassammat**.

Inussiarnersumik inuulluaqqusillunga  
p.s.

Karsten Klausen  
Allatseqarfinni pisortaq

INATSIARTUT NUTSERIASOQARFIANIT NUTSIGAQ  
SANAARTORNERMUT AVATANGIISINULLU ATAATSIMIITALIAMI  
ATUGASSIAQ  
NUTSERNERA NASSITSISUMIT AKUERISAANNGILAQ

**ISERIT**

Inatsisartut  
Postboks 1060  
3900 Nuuk

Dato 05-11-2012

J.nr. 38.28.16

Postboks 1539

3900 Nuuk

Oq/tlf: +299 36 30 00

Fax +299 36 30 19

E-mail [iserit@iserit.gl](mailto:iserit@iserit.gl)

Reg. nr. A/S349143

**UKA 2012/55-ip tusarniaassutiginera - Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata nr. 12, 19. november 2007-imeersup kingusinnerpaamik UPA 2013-imi allanngortinneqarnissaanik, Naalakkersuisut peqquneqarnissaanik aaliangiiffigisassatut siunnersuut. Taamaaliornikkut inissiap attartukkap pisiarissallugu kissaatigineqartup akia niuernerme akigititaasut tunngaviginagit, taamaallaat teknikkut aningaasatigullu inissiap akia naapertorlugu aalajangersarneqartalersillugu.**

Qulaani siunnersuut Siumumeersoq ilaatigut Iserit A/S-imut Inatsisartunit tusarniaassutigineqarpoq.

Iserit A/S-ip siunnersuut ima atuarlugulu paasivaa, attartortumit piginnittuernermit inatsiseqarnermut siusinnerusuklut atuuttumut, siunnersuut assingusorujussuusooq, taamaattumillu Iserit A/S-ip siusinnerusuklut attartortumit piginnittuernermit aaqqissuusinnermit misilittakkani aallaaviginiarpai.

Siusinnerusuklut aaqqissuusinnermi pisinnermi akigititassatut akiusooq appasinnerpaaq aalajangerneqartarpoq, Siumup siunnersuutaani ataatsimut isigalugu tunngaviliussaasutut teknikkikkut aningaasaqarnikkullu naliliineq tunngavigineqarpoq, taarsiulluguluunniit illunik tuniaasartumit niueruteqarnermi naliliineq aalajangiinerlu tunngavigineqarluni.

Illoqarfinni anginerusuni pisarnertut teknikkikkut aningaasaqarnikkullu naliliisoqartarsimavoq, niuernerme akigititaq tunngaviatigut annertunerungaartarnera pissutigalugu, taamaalilluni illu pisisumit ukiut qulit sinnerlugit pigiinnarneqartarsimappat, akit nikerarneranni qularnaveeqqutip nalikillilerneqareerqarnerani pisisut milliunit sinnerlugit aningaasaliissutitigut iluanaaruteqartarsinnaasimallutik.

Illoqarfinni mikinerusuni nalinginnaasumik tuniniaanermi akiusutut niueruteqarnermi akigititaq aalajangiunneqartarpoq, piviusut aallaavigalugit namminerisamik illunik niueruteqartarnermi inuinnarnik pisisussaqaqtanngimmat, taamaattumillu illu nutaaq assersuutigalugu 2 mio. kr.-nik akilik napparneqarneranit ukiualunnguit qaangiunneranni nalingata affaannaanut akikinnerusumilluunniit pissarsiarineqartarsinnaalluni.

Aaqqissuussinerup nutaanngitsup pitsaaqutaa qularutissaanngitsumik tassaavoq, illut pisortanit pigineqartut amerlasuut piginnittunut inuinnarnut tuniniarneqarnerat iluatsimmat, taamaalillutik pisortat piffissaq ungasinnerusoq tunaartaralugu aserfallatsaaliinermik pisussaaffeqarunnaartarlutik.

Ajoqutitut taaneqarsinnaapput illoqarfinni angisuuni aningaasaliissutitigut isertitat annertuut iluaalliortitsisut, sinngatitsisut mamiasutsitisullu. Tamatuma saniatigut oqaatigineqarsinnaavoq, aaqqissuussineq pisortat inissiaataasa attartortittakkat ikilinerinik kinguneqarmat, tamatumani inissiat attartortittakkat pilerinartut amerlassusaat inoqutigiinnut isertitakitsunut periarfissaasut ikilillutik.

Naak aaqqissuussineq nutaaq ukiuni arlalinni ingerlasimagaluartoq, attartortumit piginnittumut aaqqissuussineq annertuutigit unittoorsimasoq maluginiartariaqarpoq.

Pisortanit inissiaatit/illuutit amerlanerit inuinnarnut tunineqarnissaat naalackersuinikkut suli kissaatigineqarpat, aningaasarsiornikkut tamanna pilerinartuutinneqartariaqarpoq. Pilerinartuutitsineq tamanna ullumikkut atuutinngilaq, imaluunniit ima annertutiginani aaqqissuussineq illoqarfinni anginerusuni pilerisaarutigineqartarani.

Ullumikkut aaqqissuussinerup atuunnerasut pissusiviusut isiginiaraanni illoqarfinni anginerusuni pisortat inissiaataannik tunisisoqarneq ajorpoq. Tamanna kissaatigineqarpat, pilerinarsarineq annertunerusoq pilertariaqarpoq, imaluunniit ima taallugu aningaasaqarnikkut iluaquserneqarneq.

Iserit A/S illoqarfinni mikinerni ajornartorsiuteqaanngilaq, taakkunani illut niuruteqarnermi akigititamut pisiarinissaat attartortunut aningaasaqarnikkut annertuumik iluaqutissartaqareermat, tamannami naliliinermik akigititaaratarsinnaasumut naleqqiullugu tamatigut annertoqisumik pitsaaqutissartaqartarmat.

Taamaattorli namminerisamik inissiap/illup pisiarinissaanut – ilaatigut – inissiani pisortanit attartortikkani, ingerlatsinermut akissaajaatit ineqarnermut qularnaveeqqutitut akiliutigisartakkanut pitsanngoriaatsit ilanngullugit annertunerusumik tulluarsarnerisigut, ineqarnermut akiliutip annertuumik naleqqussarneratigut pisinnaannginnersoq isumaliutigineqartariaqarpoq.

Ilanngullugu isumaliutigineqartariaqarpoq, inissianik/illunik tuniniaanermi isertitat illoqarfinni, illunut pisortanit attartortittakkanik annertuumik utaqqiffiusartuni, sualummik Nuummi, inissiat attartortittakkat nutaat sanaartorneqarnerannut tutsinneqartassasut. Taamaanngippat inissianik/illunik attartortortumit piginnittumut aaqqissuussineq tunngavigalugu tuniniaasarneq utaqqisuniittut suli amerlanerulernerannik kinguneqarsinnaavoq, tamatumani sulisut illoqarfinnut suliffissaqarfusinnaasunut nuttarsinnaanerat annikillisinneqassaaq.

Taamaattumik attartortut amerlanerusut nammineq iniminnik/illuminnik pinissaannik kissaateqarnerup isumaginerani, kiisalu illoqarfinni amerlasuunik utaqqisoqartuni pisortat



inissiaataannik/illuutaannik attartortittakkanik tunininaanerup kingunerisaanik inissiamik sivilisuumik utaqqisarnerup sivilisoreeqisup sivitsornerunnginnissaa isumagalugu Iserit A/S-ip aaqqissuussinerup misissorneqarnissaa kaammattuutigisinnaavaa.

Taamatut isumagisaqarnermut tunngaviuvoq, innuttaasut ilaannut namminerisaminnik inimik pisisinnaanissaminnut akissaqanngitsunut (tamatumannittaag inuusuttunut ilinniagaqartunut, soraarnerussutisialinnut kiisalu innuttaasunut allanut inoqutigiiqtut annikikannersumik isertitalinnut) inissianik pisortanit attartortittakkanik naammattumik amerlassusilinnik sulii periarfissaqarnissaa, kiisalu illoqarfinnut suliffinnik periarfissalinnut sulisut killilerneqaratik nuttarsinnaanerit taamaalillunilu ataatsimut isiginerullugu suliffeqarfiit ingerlaavarsinnaanerit eqqarsaatigalugu.

Inussiarnersumik inuulluarit

Iserit A/S

(ats.)

Torben Kortegaard  
Piasortaagallartoq.

INATSISARTUT NUTSERIASOQARFIANIT NUTSIGAQ  
SANAARTORNERMUT AVATANGIISINULLU ATAATSIMIITITALIAMI  
ATUGASSIAQ  
NUTSERNERA NASSITSISUMIT AKUERISAANNGILAQ

**INI**

Sisimiut, ulloq 9. november 2012  
Kunde nr. N.A

Inatsisartunut  
Sanaartornermut Avatangiisinullu ataatsimiititaliaq  
Mailerutigineqarpoq uunga: [Rikke@inatsisartut.gl](mailto:Rikke@inatsisartut.gl)

**Pineqartoq: Aalajangiiffigisassatut siunnersuutip – UKA 2012/55-ip – tusarniaassutiginera**

Inissiaatigileqatigiiffiup INI A/S-ip ulloq 25. november 2012 tigusimavaa:

*“Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tigusisarneq pillugu Inatsisartut peqqussutaata nr. 12, 19. november 2007-imeersup kingusinnerpaamik UPA 2013-imi allanngortinneqarnissaanik, Naalakkersuisut peqquneqarnissaanik aaliangiiffigisassatut siunnersuut. Taamaaliornikkut inissiap attartukkap pisiarissallugu kissaatigineqartup akia niuernermi akigititaasut tunngaviginagit, taamaallaat teknikikkut aningaasatigullu inissiap akia naapertorlugu aalajangersarneqartalersillugu.”*

Aallaqqaasiullugu aalajangiiffigisassatut siunnersuummut nassiunneqartumut Inissiaatigileqatigiiffiup INI A/S-ip oqaaseqaatinik saqqummiussinissamut periarfissaqarnini qujassutiginiarpaa.

Inatsisartunut ilaasortat tunngavilersuutaata Inissiaatigileqatigiiffiup INI A/S-ip ima atuarpaa, siunnersuutip imminermi tunngavigigaa, Inatsisartut peqqussutaat nr. 6, 2003-mi 15. aprilimeersup Inatsisartut peqqussutaat nr. 5, 2002-mi 15. majimeersoq taarseraa, taannalu malillugu illunik allanut akikinnerusumillu tunisoqarsinnaasoq.

Aallaqqaammut Inatsisartut Peqqussusiarisimasaat 2002-meersoq, taamaalillunilu allannguut 2003-meersoq, Inatsisartut Peqqussutaat nr. 12, 19. november 2007-meersoq malillugu atorunaarsimasut pineqartumi inatsiseqarnerup misissornerani paasineqarpoq.

Oqaatigineqassaartaaq maanna aaqqissuussineq atorlugu niuernermik akigititatut nalilerneqartumut naleqqiullugu 35 %-t angullugit akikilliliisoqarsinnaammat. Inatsisartut Peqqussutaanni § 11 malillugu akikilliliineq aalajangerneqartarpoq, tassani tuniniaanermi akiusoq qanoq aalajangerneqassanersoq aamma aallassimagami.

Inissiaatigileqatigiiffik INI A/S ataatsimut isigalugu saqqummiunneqartunut ima oqaasissaqarpoq.

Immikkoortumi siullermi tunngavilersuut malillugu niuernermi akigititaq illup qanoq issusia tunngaviginagu siunnersuut tunngaviusumik aallaaveqartoq isumaqarnarpoq. Tamanna itisilertariaqarpoq, taamaattoqarsinnaappallu uppersarneqarluni.

Aamma immikkoortut aappaanni inerniliunneqarpoq, “siunissamut pitsaasumik aningaasaliinertut isigineqarsinnaanngitsoq” inissiaq niuernermi akigititaq malillugu pisiarigaanni, inissiarsuaq pineqartoq 1970-ikkunni sananeqarsimappat. Taamatut inerniliineq soqutiginartorujussuuvoq nutaamillu eqqarsarnerulluni, ersarissumillu uppersaateqarnikkut isiginneriaatsip ilumoortuuneranut iluaqutaasumik assortorneqarsinnaalluni.

Naggataagut siunnersuutip “allaffissornikkut kingunissai”, “Namminersorlutik Oqartussanut aningaasatigut kingunissai” aamma “innutaasunut inuussutissarsiornermullu kingunissai” Inissiaatigileqatigiiffik INI A/S-ip oqaaseqarfigeriaraluassanngilai.

Inussiarnersumik inuulluarit

(ats.)

Kenneth Bøjler

Inatsisitigut siunnersorti

INATSIARTUT NUTSERIASOQARFIANIT NUTSIGAQ  
SANAARTORNERMUT AVATANGIISINULLU ATAATSIMIITITALIAMI  
ATUGASSIAQ  
NUTSERNERA NASSITSISUMIT AKUERISAANNGILAQ

**QEQQATA KOMMUNIA**  
**Borgmesteri**

Ulloq/dato 7. november 2012  
All. Nr. / Brev nr. 12-0-0245  
J.nr.  
Sull./Sagsbehandler KH-S/lok. 7326

Sanaartornermut Avatangiisinullu ataatsimiititaliaq  
c/o Inatsisartut  
Postboks 1060  
3900 Nuuk

E-mail: [Rikke@inatsisartut.gl](mailto:Rikke@inatsisartut.gl)

**Tusarniaaneq – tusarniaanermi allagaqaat 25. okt. 2012-meersoq naapertorlugu, j.nr. 01.37.01.03-00069**

Inatsisartut Allattoqarfiat UKA 2012/55-imut innersuussilluni 25. oktober 2012 e-mailikkut Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaanut nr. 11-mut, 19. november 2007-imeersumut allannguutissatut siunnersuut saqqummiunneqarsimasoq pillugu tusarniaanermi kommuni akissuteqaqqusimavaa.

Siunnersuuteqartut siunnersuutertik tunngavilersorpaat, piginnittuulluni inigisassap/illugisassap tuniniaanermi akiata aalajangernissaanut aalajangersakkap atuuttup kingunerisimagaa, tuniniaanermi akiusut pingaartumik Nuummi, Sisimiuni, Ilulissani aamma Qaqortumi inissianik/illunik attartortittakkanik attartortunut tuniniaanermut atatillugu inissiat pisoqalisut teknikkikkut nalingat qaangerujussuuartarsimagaat.

Siunnersuuteqartup aamma maluginiaqquaa, allannguutissatut siunnersuut saqqummiunneqartoq illoqarfinni anginerusuni attartortunut taamaallaat iluaqutaassanngitsoq, kiisalu tassunga atatillugu Namminersornerullutik Oqartussat kommunillu inissiaataasa attartortittakkat pigisatut inissiannortissinnaanerit pillugu inatsisartut peqqussutaata allanngortinneqarneranik inatsisartut peqqussutaat nr. 6, 15. april 2003-meersumi § 8, imm. 5 innersuussutigalugu. Aalajangersagaq taanna malillugu niuffaffimmi pissutsit tamanna pissutissaqatippassuk, illup allamut kiisalu § 8, imm. 2-mi aalajangersarneqartumit akikinnerusumik tuniniarneqarsinnaanera Naalakkersuisut aalajangersinnaavaat.

Siunnersuuteqartut allannguutissatut siunnersuumminni Namminersornerullutik Oqartussat kommunillu inissiaataasa attartortittakkat pigisatut inissianngortissinnaaneratt pillugu inatsisartut peqqussutaata allanngortinneqarneranik inatsisartut peqqussutaat nr. 6, 15. april 2003-meersoq innersuussutigaat. Allannguut taamanikkut peqqussutigineqartumut Inatsisartut peqqussutaannut nr. 5-mut, 21. maj 2007-meersumut attuumassuteqartinneqarpoq. Inatsisartut peqqussutaat taanna peqqussutikkut maanna atuuttukkut Inatsiartut Peqqussutaatigut nr. 12-kut, 19. november 2007-meersukkut atorunaarsinneqarpoq, tassani § 17, imm. 2 nr. 1-kkut Peqqussut 21. maj 2002-meersoq atorunnaarsinneqarluni, taamaalillunilu aamma allannguut 15. april 2003-meersoq.

Qeqqata Kommunia isumaqarpoq, tuniniaanermi akusunut avataanit siunnersuutit attartortunut tuniniaanerup aallartinnginnerani illuutiniq ilisimannittunit sioqqutsilluni piniarqartartut illup pineqartup taknikkikkut aningaasatigullu nalinganik aallaaveqartartut. Ineqarnermut, Attaveqarnermut Angallanermullu Naalackersuisoqarfik inissianik attartornermi akiliutit naatsorsornerat pillugu ilitsersuummi ima taasaqarnikuuvoq: ”Teknikkikkut-aningaasatigut naliliineq illuutigisap sumi inissisimanera alianaassusialu isiginiarnagu maanna nalinganut naleqqersuunneqarsinnaavoq.”

Aammattaaq kommuni isumaqarpoq, inatsisit maanna atuuttut malillugit attartortup niuernermi akitigititaq naleqquutoq naatsorsuutigisinnaagaa, tassanilu illup aserfallassimanera, pisoqaassusaa, inissisimanera aamma alianaassusiata nalinga naleqquttumik mianerineqartoq. Niuernermi naligititami tassani tamatuma saniatigut 35 %-it angullugit pisoqaassusaanut akikilliliisoqartarpoq, piseratarsinnaasoq attartortutut qanoq sivisutigisumik nalunaarsorneqarsimanera apeqquataatillugu.

Arajutseqqunngilarpulli ukiuni Inatsisartut Peqqussutaata nr. 12-p, 19. nov. 2007-imeersup akuerineqarnissaata tungaanut ”Attartortumit Piginnittuunermet” aqqissuussineq malillugu taamanikkut malittarisassat malillugit tunianiaanermut akigititap nalilerneqarneratigut kommunimit illuutiniq arlalippassuarnik tuniniaanernik ingerlatsisoqarsimammat.

Inussiarnersumik inuulluaqqusillunga

(ats.)

Harmann Berthelsen

Borgmesteri

INATSIARTUT NUTSERIASOQARFIANIT NUTSIGAQ  
SANAARTORNERMUT AVATANGIISINULLU ATAATSIMIITITALIAMI  
ATUGASSIAQ  
NUTSERNERA NASSITSISUMIT AKUERISAANNGILAQ

**Grønlands Ejendoms kontor**

H.J. Rinksvej, Postboks 28, 3900 Nuuk

[www.ejendomskontoret.gl](http://www.ejendomskontoret.gl)

Telefon: 34 35 37, Telefax: 34 35 37, Mail: [post@ejendomskontoret.gl](mailto:post@ejendomskontoret.gl)

Inatsisartut  
Sanaartornermut Avatangiisinullu ataatsimiititaliaq  
E-mail: [rikke@inatsisartut.gl](mailto:rikke@inatsisartut.gl)

Nuuk, den 14. november 2012.

**UKA 2012/55 pillugu tusarniaaneq**

Tusarniaanermut allakkiaq 25.10.2012-meersoq innersuussutigalugu imaa oqaaseqaateqassaanga:

**Aalajangiiffigisassatut siunnersuut**

Ima paasivara, Inatsisartut Peqqussutaat nr. 12, 19. november 2007-meersumi, § 11, imm. 1 naapertorlugu "attartortumit piginnittuunermut" aqqissuussineq malillugu inissiamik pisinermi pisiarineqartup akiata teknikikkut aningaasatigut naliliinikkut aalajangerneqartarnissaa kissaatigineqartoq, maannakkutut niuruteqarnermik naliliisarnermut taarsiullugu.

Oqaatigineqarpoq, niuruteqarnermi akigitamut naapertuunnissaa aalajangerneqarmat, pisortanit inissianik niuruteqarnermi (attartortumit piginnittuunermut niuruteqarnermi) akitigut ineriartorneq qaffakkiartorsimasoq. Ilanngunneqarpoq ilaatigut inissaaleqinerujussuaq pissutaalluni akit pissusissamisuunngitsunik qaffasissimasut.

**Aallarniut**

Aallaqqaasiullugu ilisimatitsissutigissavara, kisitsisitigut paasissutissaateqannginnama innersuussinnaasannik. Tusarniaanermut akissut una taamaallaat Kalaallit Nunaanni sumiiffinni assigiinngitsuni amerlasuuni niuruteqarnermi akigitat naatsorneqartarnerat pillugu suliaqarnermik misilittagarilersimasannik taamaallaat tunngaveqarput.

**Kalaallit Nunaanni illunik/inissianik niuruteqartarneq**

Inuiaqatigiit katitigaanerat inuussutissarsiutillu naluneqanngitsutut Kalaallit Nunaanni assigiinngitsorujussuarmik ineriartorput. Nuummi sanaartukkanut nutaanut sanaartorfissaaleqisoqarpoq. Sumiiffinni allani sanaartukkanut nutaanut assigiinngitsunik periarfissaqartitsisoqartarpoq. Taamaalilluni pisisinnaanerup naapertorneqarnissaanut periarfissat assigiinngitsorujussuupput. Sinerissami sumiiffinni amerlasuuni illunik/inissianik inoqanngitsunik peqarpoq.

**I Nuuk**

Nuummi illunik/inissianik niuruteqarneq ingerlalluarpoq, ataatsimullu isigalugu illunik/inissianik piserusuttoqarpoq. Akeqartitsinermi neqeroorutit taaneqartutullu pisiariumanninneq aalajangiisuusarput, naleqqussarneqartarlutillu pigisap aalaakaasup pitsaassusia, inissisimanagera aamma isikkivia aallaavigalugu.

Illoqarfimmi suliaqarnerup annertussusia annertuvoq, taamatullu ingerlaannassalluni. Sanaartorfissat amigaataapput.

Akigititap pilertarnera nikerartuuvoq, piffissalli ingerlanerani akigitigut ineriartorneq ataatsimut isigalugu annertusiartorpoq. Akigitigut ineriartorneq taarsigassarsiniartarfinit taarsigassarsianik periarfissiinikkut aningaalersuineramik iluaquserneqartarpoq.

## **II Sisimiut aamma Ilulissat**

Taakkunani illoqarfimmi inuussutissarsiutinik ingerlatsinerit arriinnerupput. Sanaartorfissanik pissarsinissaq periarfissaavoq.

Inissianik/illunik neqerooruteqartarnek piserusunnerlu naammaginatsumik ingerlapput, kisianni illumut nutaamut teknikikkut akigititamit qaffasinnerusumik akeqartitsinissaq ajornakusoorpoq.

Taarsigassarsiniartarfiit aningaaseriviillu illoqarfimmi taakkunani aningaalersuinissamut periarfissaapput.

Niueruteqarnermi akigititap qaqutigut teknikikkut akigititamit qaffasinnerusarpoq.

## **III Qaqortoq**

Piginnittuulluni inigisat/illuutit atatillugu akigitigut ineriartornermut sanilliullugu innuttaasut katitigaanerat naammaginatsumik ineriartorsimangilaq. Illunik/inissianik tuniarneqarsinnaassunik neqerooruteqarnek piserusunnermit annertuneruvoq.

Taarsigassarsiniartarfiit Qaqortumi taarsigassasisitsinnaaneq isornartorsiuinerullutik isiginiassagaat aarleqqutigineqarsinnaavoq. Aningaaseriviit Qaqortumi taarsigassarsisisarnerat immikkut killilersorneqarnerusutut nalilerneqarpoq.

Niueruteqarnermi akigititap amerlanertigut teknikikkut akigititamit appasinnerusarpoq.

## **IV Illoqarfiit allat**

Akigitigut taakkunani ineriartortoqanngilaq, piserusussuseq appaseqimmat. Akigititap takussutissaannaanerusarpoq. Amerlasuutigut kr. 75-100.000,-t ataallugit. Pissutsit immikkorluinnaq ittut pissutaaneranni kr. 250.000,-t qummut killigalugu akeqartitsisoqartarpoq. Nunaqarfimmi akit suli annikinnerusarput.

Sumiiffimmi tamani teknikikkut naliusoq niueruteqarnermi naligititamit annertunerusarpoq (imaluunniit illu tunineqarsinnaasarani).

Ersarissaatigineqarsinnaavoq, Maniitsoq pitsaanerusumik inissisimammat, III-p aamma IV-p akornanni inissisimagami.

## **Niueruteqarnermi akigititap iml. teknikikkut/aningaasatigut nalinga**

Siunnersuummut tunngavilersuutitut taaneqarpoq, inissaaleqineq pissutigalugu akit pissusissamisuunngitsumik qaffasissuusimasut. Tamanna taamaallaat Nuummi atuuppoq, naak pissusissamisuunngitsumik qaffasissumik akigititanut taarsiullugu illunik/ininik niuerneq ingerlalluartoq nammineq taarusukkaluarlugu. Tamatumani pisortanit imaluunniit namminerisamik niueruteqarnerit immikkoortikkuminaapput.

Kalaallit Nunaanni nuna tamakkerlugu maleruagassat assigiit, taamatuttaaq ineqarnermut tunngasuni amerlasuuni, ajornakusoorluinnarput. Maleruagassat immikkoortitaartinneqartariaqarput, suliamullu aamma sumiissutsimut atatillugu pineqartuni ataasiakkaani naalackersuinikkut anguniakkat naleqqussarneqartariaqarlutik.

Naalackersuinikkut anguniagassanik inissitsiterisinnaanngilanga, siulianili taasani pissutsit ataasiakkaat isumagalugit malittarisassanik allanngortitsiniarnerit mianersuussassarujussuupput. Sumiiffimmi ataatsimi malittarisassanik allanngineq sumiiffinnut allanut naleqqutinngitsumik kinguneqarsinnaapput.

Sumiiffinni qulaani pineqartuni tamani attartortumit piginnittumut aaqqissuussinermut atatillugu illut niuerutigalugu akiusup aalajangersartarneranut akuusarnikuuvunga. Maluginiarnikuuara niueruteqarnermi akigititap aalajangerneqartarnera mianersuunneqartartoq. Aningaasatigullu pisariaqartitsinermi aamma pisisup aserfallatsaaliinermut naammaginartumilu piffissaqartinneqarluni nalikilliliinissamut aamma periarfissaqartassaaq, taamaalilluni kingusinnerusukkat pigisap aalaakkasup tuniniarnissaanut pisisoq akitsoriartornerit aallaavigalugit aningaasannanniuteqassanngimmat.

Tuniniaanermi akigititamut tunngaviusup aalajangertarneranut taarsiullugu, immaqa tuniniaanermik akikillisaasinnerup aaqqiivigineqarnissaa naleqquttuusinnaavoq, soorlu tamanna peqqussummi § 11, imm 2-mi periarfissaareersoq.

Qulaani sumiiffimmi IV-mi illunut amerlanernut atatillugu “takussutissatut” tuniniaanermi/niurutigalugu akigititap aalajangerneqartarnera aqutsinikkut ajornanngikannersumik maleruagassiuunneqarsinnaavoq “pissusissamisootumik” akigititatut aalajangersarlugu.

Inussiarnersumik inuulluaqqusillunga  
Magnus Agerskov





Inatsisartut  
Sanaartornermut Avatangiisinullu Ataatsimiititaliaq  
Ataatsimiititaliami siulittaasoq  
Juliane Henningsen  
/ maani

ILANNGUSSAQ 2

**UKA2012/55 Inip attartortittakkap, inip nalingata teknikkikkut  
aningsaasaqarnikkullu nalillineq tunngavigalugu pissarsiariniarneqartup,  
tuniniaanermi akiata aalajangertarnera**

2. november 2012  
Sagsnr. 2012-072314  
Dok. Nr. 1056133

Asasara Juliane Henningsen,

*UKA 2012/55-ip Ataatsimiititaliamit suliarineqarneranut atatillugu Ataatsimiititaliap uku  
kissaatigai:*

*Namminersorlutik Oqartussat kommunillu inissiaataasa attartortittakkat 1. januar 2008  
sioqqullugu mannaluk tikillugu inissiatut imaluunniit illutut nammineq pigisassatut  
tiguneqartut kvadratmeterikkaamik akitigut ineriartornerat pillugu kisitsisitigut  
paasissutissat oqaasertalersukkat.*

#### Akissut

Aallarniutigalugu erseqqissaatigineqassaaq, inissianik kommuninit pigineqartunik  
tunisinermit paasissutissanik Namminersorlutik Oqartussat pigisaqanngimmata.

Tamatuma saniatigut ilisimatitsissutigineqassaaq, paasissutissat kissaatigineqartut  
pissarsiarineqarsinnaanngimmata. 1. januar 2008-p kingorna piffissami inissianik  
nammineerluni pigisanik 52-inik, aamma illunik ilaqutariinnut ataatsinut inissianik illunillu  
affarleriinnik 206-inik taamaallaat tunisaqarsimaneq tamatumunnga pissutaavoq.

1. januar 2008-p kingorna tunisinerit nunami sumiiffiit piffissallu eqqarsaatigalugit  
siammasissorujussuummata, 1. januar 2008-p siornatigut kvadratmeterimut akit  
ineriartornerat nassuiaateqarfigineqarsinnaanngilaq. Tamatuma saniatigut 1. januar  
2008 sioqqullugu attartortumiit piginnittumut aaqqissuussineq malillugu inissianik  
nammineerluni pigisanik tunisisoqarsimanngilaq, taamaallaalli illunik ilaqutariinnut  
ataatsinut inissianik illunillu affarleriinnik tunisisoqartarsimalluni.

Matuma kinguliani 2003-miit 2011-mut niuernerit amerlassusii, akit katinneri aammalu  
akit agguaqatigiissinneri takussutissiorneqarput.

Ukioq	2003	2004	2005	2006	2007	2008	2009	2010	2011
Katillugit	6,6 mio. kr.	14,2 mio. kr.	7,5 mio. kr.	9,4 mio. kr.	9,5 mio. kr.	1,9 mio. kr.	21,8 mio. kr.	34,5 mio. kr.	21,0 mio. kr.
Agguaqatigiissillugit	347 t.kr.	569 t.kr.	500 t.kr.	470 t.kr.	730 t.kr.	630 t.kr.	436 t.kr.	466 t.kr.	403 t.kr.

Kiisalu attartortumiit piginnittumut aaqjissuussineq pillugu nassuiaat, 2007-imi aprillimi  
Inatsisartunut agguanneqartoq ilaliunneqartoq innersussutigineqarpoq.

Inussiarnersumik inuulluaqqusillunga

Jens B. Frederiksen



Inatsisartut  
Sanaartornermut Avatangiisinullu Ataatsimiititaliaq  
Ataatsimiititaliami siulittaasoq  
Juliane Henningsen  
/ maani

ILANNGUSSAQ 3

**Sanaartornermut Avatangiisinullu Ataatsimiititaliap UKA 2012/55 pillugu  
isumasioqatigiilluni ataatsimeeqatigineqarnera**

19. november 2012  
Sagsnr.: 2012-072314  
Dok.nr.: 1069857

Asasara Juliane Henningsen,

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Aallarniutigalugu ataasingornermi ulloq 19. november 2012 nal. 14.00 Sanaartornermut Avatangiisinullu ataatsimiititaliamik Ataatsimiittarfik 2-imi UKA2012/55 "Namminersorerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata nr. 12, 19. november 2007-imeersup kingusinnerpaamik UPA 2013-imi allanngortinneqarnissaanik, Naalakkersuisut peqquneqarnissaanik aalajangiiffigisassatut siunnersuut. Taamaaliornikkut inissiap attartukkap pisiarissallugu kissaatigineqartup akia niuernermi akigititaasut tunngaviginagit, taamaallaat teknikikkut aningaasatigullu inissiap akia naapertorlugu aalajangersarneqartalersillugu" pillugu isumasioqateqarnissamut Sanaartornermut Avatangiisinullu Ataatsimiititaliaq aggersaaneranut qutsavigerusuppara.

Siullermik Ataatsimiititaliap apeqqutai issuarneqartassapput, tamatuma kingorna akissutinik malitseqartinneqartassallutik.

UKA2012/55 pillugu apeqqut

**Apeqqut 1:**

*Sanaartornermut Avatangiisinullu ataatsimiititaliap UKA 2012/55-ip suliarineqarneranut atatillugu tusarniarneqartut assigiinngitsut allakkatigut tusarniaaffigisimavai. Tusarniaanermi allakkap, tusarniaaffigineqartut allattorsimaffiisa aamma tusarniaanermi akissutit tiguneqartut assilineri tapiliunneqarput.*

*Tusarniaanermi akissutinut tiguneqartunut isumaliutit oqaaseqaatillu suut saqqummiunnissaannut Naalakkersuisut pissutissatik pillugit nassuiaateqarnissaat Ataatsimiititaliap kissaatigaa. Akissummut atugassatut Aningaasaqarnermut Naalakkersuisup tusarniaanermi akissutinut oqaaseqaatigisinnaasai Ataatsimiititaliap qinnutigai.*

**AKISSUT**

Tusarniaanermi akissutit tiguneqartut soqutigilluarlugit atuarpakka. Ataasiakkaalli oqaaseqarfingikkaluarlugit erseqqissaatigisariaqarpara, siunnersuummut saqqummiunneqartumut oqaaseqaatit minnerunngitsumillu Grønlandsbanken-imit annilaanganartoqartinneqartut Naalakkersuisunit tamakkiisumik taparserneqarmata. Grønlandsbanken ilaatigut allappoq, siunnersuut akuerineqassappat,

anigaasalersueriaatsit maannakkut atorneqartut atorlugit Kalaallit Nunaanni inissianik niuruteqarnermut anigaasalersuisarnerup ingerlaannarnissaa ilimagineqarsinnaanngitsoq. Tassami Grønlandsbanken allappoq, tamanna qularnassasoq. Tamanna aamma tusarniaanermut atatillugu oqaaseqaatinik Nykredit-imit saqqummiunneqartunit tapersernejarpooq.

## **Apeqquut 2:**

*Tusarniaanermut akissutini arlaqartuni taaneqarpoq, attartortumit piginnittuunermut aaqqissuussineq atorlugu pisisoqanngingajassimasooq. Init attartukkat pisiarinissaannut attartortut annertunerusumik pilerisaarneqassappata ineqarnermut inatsiseqarnerup aaqqissuuteqqinnissaa qanoq Naalakkersuisut eqqarsaatigaat?*

## **AKISSUT**

Ilisimatitsissutigisinnaavara, Namminersorlutik Oqartussat 2007-imiit ullumikkumut illoqarfinni Qaqortumi, Narsami, Paamiuni, Nuummi, Maniitsumi, Sisimiuni, Aasianni, Qasigianguani, Ilulissani, Qeqertarsuarmi, Uummannami, Upernavimmi, Tasiilami aamma Ittoqqortoormiini inissiat 120-t sinnerlugit tunisimammagit.

Taamaattumik maleruagassat iluarsaanneqarnissaasa pisariaqartinneqarnerannut Naalakkersuisut isumaqataanngillat. Naalakkersuisut isumaqarput, matumani isummeriaatsit apeqqutaanerusut, tassalu innuttaasut amerlanerit inissianik imminnut pilersornissaannut ilinniartinneqarnissaat pineqarnerusoq. Suliaq taanna ingerlavog – tamatumunnga inissianik nammineerluni pigisanik niuruteqarnerup ersarinneruleriartornera annertusiartorneralu takussutissaavoq.

Ineqarneq pillugu nassuiaammi, UPA 2012-imi saqqummiunneqartumi takuneqarsinnaavoq, Naalakkersuisut siunissami inissianut attartortittakkanut akiusunut anigaasartuutit tunngavigineqarnerunissaat siunnerfigigaat. Inissiani nutaani iluarsaanneqarsimasunilu ineqarnermut akiliutit anigaasartuutiviusunik tunngaveqartinneqartassapput, taamatullu piffissalikkamik aserfallatsaaliuinissamut anigaasanik naammattunik immikkoortitsisoqartalissaaq, inissiat aserfallaqqinnginniassammata. Tamatuma kingunerisaanik ineqarnermut akiliutit qaffassapput, taamaalillunilu aamma inissiamik nammineerluni pigisamik pisinissamut anigaasaqarnikkut kajumissaarusiisoqassaaq.

Tamatumunnga atatillugu ilisimatitsissutigissavara, Ilaqutariinnermut, Ilageeqarnermut, Kultureqarnermut Naligiissitaanermullu Naalakkersuisooq suleqatigalugu suleqatigiissitaliorama, ineqarnermut tapiissuteqartarneq pillugu nalunaarutip iluarsaanneqarnissaanik siunnersuusiortussamik, tassanilu isertitanut killissarititaasut ineqarnermut akiliutit nutaat qaffasissusiinut naleqqussarneqarnissaat ilimagineqarpoq.

--o0o--

Isumasioqatigiinnissamut aggersaassummut matumunnga atatillugu Anigaasaqarnermut Naalakkersuisooqarfik tusarniaaffigineqarpoq. Tamatumunnga atatillugu Naalakkersuisooqarfik imaattumik ilisimatitsissuteqarpoq: *"Anigaasaqarnermut Naalakkersuisooqarfiup maluginiarpaa, tusarniaanermi akissuteqaatini tamani, Naalakkersuisooqarfiup tusarniaanermi akissuteqaataa assigalugu, aalajangiiffigisassatut siunnersuutip itigartinneqarnissaa inassutigineqartoq. Taamaattumik tusarniaanermi*

*akissuteqaatit Aningaasaqarnermut Naalackersuisoqarfiup nutaanik  
isumaliutersuuteqarnissaanut tunngavissiinngillat..”*

Neriuppunga matumuunakkut apeqqutit saqqummiunneqartut naammaginartumik  
akisimassallugit.

Inussiarnersumik inuulluaqqusillunga

Jens B. Frederiksen